

法華經合論

四之五


C40
4514
(12)

C 40-4574

了翁上座請大藏及有
家古置武州雲山
我徵笑塔院府口永
為學者不敢許出院內
當山二世鐵牛機證誌



B 64853



妙法蓮華經合論卷第四

經

姚秦三藏法師鳩摩羅什譯

論

宋寶覺圓明禪師惠洪造

附論

宋丞相無盡居士張商英撰

妙法蓮華經五百弟子授記品第八

爾時富樓那彌多羅尼子從佛聞是智慧方便隨宜
說法又聞授諸大弟子阿耨多羅三藐三菩提記復
聞宿世因緣之事復聞諸佛有大自在神通之力得
未曾有心淨踊躍即從座起到於佛前頭面禮足却
住一面瞻仰尊顏目不暫捨而作是念世尊甚奇特
所為希有隨順世間若干種性以方便知見而為說

法拔出衆生處處貪著我等於佛功德言不能宣唯
佛世尊能知我等深心本願爾時佛告諸比丘汝等
見是富樓那彌多羅尼子不我常稱其於說法人中
最爲第一亦常歎其種種功德精進護持助宣我法
能於四衆示教利喜具足解釋佛之正法而大饒益
同梵行者自捨如來無能盡其言論之辯汝等勿謂
富樓那但能護持助宣我法亦於過去九十億諸佛
所護持助宣佛之正法於彼說法人中亦最第一又
於諸佛所說空法明了通達得四無礙智常能審諦
清淨說法無有疑惑具足菩薩神通之力隨其壽命
常修梵行彼佛世人咸皆謂之實是聲聞而富樓那

以斯方便饒益無量百千衆生又化無量阿僧祇人
令立阿耨多羅三藐三菩提爲淨佛土故常作佛事
教化衆生諸比丘富樓那亦於七佛說法人中而得
第一今於我所說法人中亦爲第一於賢劫中當來
諸佛說法人中亦復第一而皆護持助宣佛法亦於
未來護持助宣無量無邊諸佛之法教化饒益無量
衆生今立阿耨多羅三藐三菩提爲淨佛土故常勤
精進教化衆生漸漸具足菩薩之道過無量阿僧祇
劫當於此土得阿耨多羅三藐三菩提號曰法明如
來應供正徧知明行足善逝世間解無上士調御丈
夫天人師佛世尊其佛以恒河沙等三千大千世界

爲一佛土七寶爲地地平如掌無有山陵溪澗溝壑
七寶臺觀充滿其中諸天宮殿近處虛空人天交接
兩得相見無諸惡道亦無女人一切衆生皆以化生
無有媼欲得大神通身出光明飛行自在志念堅固
精進智慧普皆金色三十二相而自莊嚴其國衆生
常以二食一者法喜食二者禪悅食有無量阿僧祇
千萬億那由他諸菩薩衆得大神通四無礙智善能
教化衆生之類其聲聞衆筭數校計所不能知皆得
具足六通三明及八解脫其佛國土有如是等無量
功德莊嚴成就劫名寶明國名善淨其佛壽命無量
阿僧祇劫法住甚久佛滅度後起七寶塔遍滿其國

爾時世尊欲重宣此義而說偈言

諸比丘諦聽佛子所行道善學方便故不可得思議
知衆樂小法而畏於大智是故諸菩薩作聲聞緣覺
以無數方便化諸衆生類自說是聲聞去佛道甚遠
度脫無量衆皆悉得成就雖小欲懈怠漸當令作佛
內秘菩薩行外現是聲聞少欲厭生死實自爭佛土
示衆有三毒又現邪見相我弟子如是方便度衆生
若我具足說種種現化事衆生聞是者心則懷疑惑
今此富樓那於昔千億佛勤修所行道宜護諸佛法
爲求無上慧而於諸佛所現居弟子上多聞有智慧
所說無所畏能令衆歡喜未曾有疲倦而以助佛事

已度大神通具四無礙智知諸根利鈍常說清淨法
演暢如是義教諸千億衆令住大乘法而自淨佛土
未來亦供養無量無數佛護助宣正法亦自淨佛土
常以諸方便說法無所畏度不可計衆成就一切智
供養諸如來護持法寶藏其後得成佛號名曰法明
其國名善淨七寶所合成劫名爲寶明菩薩衆甚多
其數無量億皆度大神通威德力具足充滿其國土
聲聞亦無數三明八解脫得四無礙智以是等爲僧
其國諸衆生媯欲皆已斷純一變化生具相莊嚴身
法喜禪悅食更無餘食想無有諸女人亦無諸惡道
富樓那比丘功德悉成就當得斯淨土賢聖衆甚多

如是無量事我今但略說

論曰富樓那彌多羅尼子者生於五天附庸寒陋
之國然其爲人隆準白析精敏絕倫有大智慧善
說法要佛每稱之以爲說法第一其母亦英靈有
卓識誦四韋陀書聲被諸國富樓那嘗白佛願還
本國作佛事利益有情佛曰汝國弊惡奈何富樓
那曰我當修忍若毀辱我我當作念幸不以拳毆
我設遭拳毆又當作念幸不捶楚我設遭捶楚又
當作念幸不兵刃我設遭兵刃又當作念因受兵
刃幸離此五陰毒器也佛贊嘆之曰非特汝持是
忍力我亦從中證舍利弗亦從而合爪稱美曰一

切梵行人當縈衣頂戴於汝若見汝者得大利益
初其父禱於江瀕之祠祠大梵天之像也願求嗣
息而值江滿又夢寶噐中衆寶皆滿入母之懷及
生子矣所願得滿故名滿願母彌多羅尼此言慈
有問其姓氏者答曰我父名滿我母名慈諸梵行
人呼我爲滿慈子今佛授記過無量阿僧祇劫當
於此土得阿耨多羅三藐三菩提號曰法明如來
乃至以恒河沙等三千大千世界爲一佛土七寶
臺觀充滿其中劫名寶明國名善淨壽無量阿僧
祇劫法住甚久佛滅後起七寶塔徧滿其國其因
善說法要故號法明其行可貴故劫名寶明慈力

和易故國名善淨至於應緣而生則禱江見夢皆
以滿爲祥及其證果則所化之國衆寶莊嚴充滿
旣化之後一切塔廟亦復徧滿蓋三世古今本一
念也

爾時千二百阿羅漢心自在者作是念我等歡喜得
未曾有若世尊各見授記如餘大弟子者不亦快乎
佛知此等心之所念告摩訶迦葉是千二百阿羅漢
我今當現前次第與受阿耨多羅三藐三菩提記於
此衆中我大弟子憍陳如比丘當供養六萬二千億
佛然後得成爲佛號曰普明如來應供正徧知明行
足善逝世間解無上士調御丈夫天人師佛世尊其

五百阿羅漢優樓頻螺迦葉伽耶迦葉那提迦葉迦
留陀夷優陀夷阿菟樓駄離婆多劫賓那薄拘羅周
陀莎伽陀等皆當得阿耨多羅三藐三菩提盡同一
號名曰普明爾時世尊欲重宣此義而說偈言
憍陳如比丘當見無量佛過阿僧祇劫乃成等正覺
常放大光明具足諸神通名聞徧十方一切之所敬
常說無上道故號爲普明其國土清淨菩薩皆勇猛
咸昇妙樓閣遊諸十方國以無上供具奉獻於諸佛
作是供養已心懷大歡喜須臾還本國有如是神力
佛壽六萬劫正法住倍壽像法復倍是法滅天人憂
其五百比丘次第當作佛同號曰普明轉次而授記

我滅度之後某甲當作佛其所化世間亦如我今日
國土之嚴淨及諸神通力菩薩聲聞衆正法及像法
壽命劫多少皆如上所說迦葉汝已知五百自在者
餘諸聲聞衆亦當復如是其不在此會汝當爲宣說
爾時五百阿羅漢於佛前得受記已歡喜踊躍卽從
座起到於佛前頭面禮足悔過自責世尊我等常作
是念自謂已得究竟滅度今乃知之如無智者所以
者何我等應得如來智慧而便自以小智爲足世尊
譬如有人至親友家醉酒而卧是時親友官事當行
以無價寶珠繫其衣裏與之而去其人醉卧都不覺
知起已遊行到於他國爲衣食故勤力求索甚大艱

難若少有所得便以爲足於後親友會遇見之而作
是言咄哉丈夫何爲衣食乃至如是我昔欲令汝得
安樂五欲自恣於某年日月以無價寶珠繫汝衣裏
今故現在而汝不知勤苦憂惱以求自活甚爲癡也
汝今可以此寶貿易所須常可如意無所乏短佛亦
如是爲菩薩時教化我等令發一切智心而尋廢忘
不知不覺旣得阿羅漢道自謂滅度資生艱難得少
爲足一切智願猶在不失今者世尊覺悟我等作如
是言諸比丘汝等所得非究竟滅我久令汝等種佛
善根以方便故示涅槃相而汝謂爲實得滅度世尊
我今乃知實是菩薩得受阿耨多羅三藐三菩提記

以是因緣甚大歡喜得未曾有爾時阿若憍陳如等
欲重宣此義而說偈言

我等聞無上安隱受記聲歡喜未曾有禮無量智佛
今於世尊前自悔諸過咎於無量佛實得少涅槃分
如無智愚人便自以爲足譬如貧窮人往至親友家
其家甚大富具設諸肴饍以無價寶珠繫著內衣裏
默與而捨去時卧不覺知是人旣已起遊行詣他國
求衣食自濟資生甚艱難得少便爲足更不願好者
不覺內衣裏有無價寶珠與珠之親友後見此貧人
苦切責之已示以所繫珠貧人見此珠其心大歡喜
富有諸財物五欲而自恣我等亦是世尊於長夜

常慙見教化令種無上願我等無智故不覺亦不知
得少涅槃分自足不求餘今佛覺悟我言非實滅度
得佛無上慧爾乃爲真滅我今從佛聞受記莊嚴事
及轉次受決身心遍歡喜

論曰阿若憍陳如者寬仁博識大慧通達以最初
得法故一時大弟子中推其早悟爲冠曰日佛也
明星憍陳如也日初昇則明星現以此星破長夜
之暗而陳如則破無明之暗故也佛爲太子時棄
國入山學道其父淨飯王念之不忘遣親信五人
者往侍衛之陳如其一也二人則以欲爲淨三人
則以苦行爲淨而太子專修苦行故二人者棄之

而去其後太子受飲食蘇油暖水三人者曰噫太
子亦捨苦行矣於是亦棄而去之然太子得道先
爲此五人說法蓋其因地佛於飢世化其身爲人
魚躍浪及岸浪去迅疾魚留沙鹵間示作死相有
梓匠五人行見之先斧其肉餘飢乏者爭赴之佛
以魚身誓曰我若成佛要先度此五梓匠也今佛
受記當供養六萬二千億佛然後成佛號曰普明
而與五百阿羅漢同號以其因最先悟無生智破
無明癡暗故其成佛亦號普明也迦留陀夷此言
黑色光優陀夷此言出現周陀具言陀奴莎伽陀
此言善來餘者已見序品釋之是諸大士皆衆中

之選者故特標之

無盡居士張商英論曰滿慈於人中說法第一既聞化城之非實知寶所之不遠世尊知其深心本願卽記之汝於未來成佛號曰法明又與一千二百心自在者次第授記憍陳如號曰普明五百阿羅漢既受佛記卽得如來方便法音隨宜說法卽引醉客衣珠之喻以明斯義與向之自謂究竟滅度不侔矣

妙法蓮華經授學無學人記品第九

爾時阿難羅睺羅而作是念我等每自思惟設得授記不亦快乎卽從座起到於佛前頭面禮足俱白佛

言世尊我等於此亦應有分唯有如來我等所歸又我等爲一切世間天人阿脩羅所見知識阿難常爲侍者護持法藏羅睺羅是佛之子若佛見授阿耨多羅三藐三菩提記者我願旣滿衆望亦足爾時學無學聲聞弟子二千人皆從座起偏袒右肩到於佛前一心合掌瞻仰世尊如阿難羅睺羅所願住立一面爾時佛告阿難汝於來世當得作佛號山海慧自在通王如來應供正徧知明行足善逝世間解無上士調御丈夫天人師佛世尊當供養六十二億諸佛護持法藏然後得阿耨多羅三藐三菩提教化二十千萬億恒河沙諸菩薩等令成阿耨多羅三藐三菩提

國名常立勝旛其土清淨琉璃爲地劫名妙音遍滿
其佛壽命無量千萬億阿僧祇劫若人於千萬億無
量阿僧祇劫中算數校計不能得知正法住世倍於
壽命像法住世復倍正法阿難是山海慧自在通王
佛爲十方無量千萬億恒河沙等諸佛如來所共讚
歎稱其功德爾時世尊欲重宣此義而說偈言

我今僧中說阿難持法者當供養諸佛然後成正覺
號曰山海慧自在通王佛其國土清淨名常立勝旛
教化諸菩薩其數如恒沙佛有人威德名聞滿十方
壽命無有量以愍衆生故正法倍壽命像法復倍是
如恒河沙等無數諸衆生於此佛法中種佛道因緣

爾時會中新發意菩薩八千人咸作是念我等尚不
聞諸大菩薩得如是記有何因緣而諸聲聞得如是
決尔時世尊知諸菩薩心之所念而告之曰諸善男
子我與阿難等於空王佛所同時發阿耨多羅三藐
三菩提心阿難常樂多聞我常勤精進是故我已得
成阿耨多羅三藐三菩提而阿難護持我法亦護將
來諸佛法藏教化成就諸菩薩衆其本願如是故獲
斯記阿難面於佛前自聞受記及國土莊嚴所願具
足心大歡喜得未曾有卽時憶念過去無量千萬億
諸佛法藏通達無礙如今所聞亦識本願尔時阿難
而說偈言

世尊甚希有今我念過去無量諸佛法如今日所聞
我今無復疑安住於佛道方便爲侍者護持諸佛法
論曰阿難此言歡喜佛成道之日乃生於釋氏蓋
佛諸弟也生二十歲爲佛侍者其相美好初佛使
著覆肩之服有女子將兒臨井欲汲顧見阿難目
不暇瞬悞以汲綆繫兒之頸兒幾絕又隨佛入天
人宮龍宮所見美女雖未盡殘思心已無染爲諸
天人龍神所恭敬佛每曰阿難比他侍者爲勝他
侍者聞說乃解阿難於佛未發言已解其意須此
不須此皆悉能知後以法藏付囑之初四天王各
以鉢獻佛佛累之以手平之而爲一而四鉢之緣

宛然然此鉢重大阿難每荷之隨佛無懈容年二
十五侍佛所聞八十千捷度皆誦不遺不重問一
句其念力精妙如此佛入般涅槃在師子床迦葉
大衆見而贊曰面如淨滿月眼若青蓮華佛法大
海水流注阿難心自誓入涅槃住則恐離車怨進
則恐闍王怨於是至恒河中入風奮迅三昧分身
爲四分之一以與天一以與龍一以與毗舍離一以
與阿闍世阿育王禮其塔奉千萬兩金贊以偈曰
能攝持法身法燈故法住念盛佛智海故設上供
養念持多所聞口出微妙語世尊所贊歎天人之
所愛今佛授記於來世當得作佛號山海慧自在

通王如來國名常立勝幡劫名妙音徧滿其因以持佛法藏一切天魔外道所當懾伏故其佛國名常立勝幡以演法音至一切處故其劫名妙音徧滿夫自空王佛所同佛發心勇猛明利不動如山廣大如海而深入妙義故其慧辯自在於一切法與奪無礙故其通達如王也

爾時佛告羅睺羅汝於來世當得作佛號蹈七寶華如來應供正徧知明行足善逝世間解無上士調御丈夫天人師佛世尊當供養十世界微塵等數諸佛如來常爲諸佛而作長子猶如今也是蹈七寶華佛國上莊嚴壽命劫數所化弟子正法像法亦如山海

慧自在通王如來無異亦爲此佛而作長子過是已後當得阿耨多羅三藐三菩提今時世尊欲重宣此義而說偈言

我爲太子時羅睺爲長子我今成佛道受法爲法子於未來世中見無量億佛皆爲其長子一心求佛道羅睺羅密行唯我能知之現爲我長子以示諸衆生無量億千萬功德不可數安住於佛法以求無上道爾時世尊見學無學二千人其意柔軟寂然清淨一心觀佛佛告阿難汝見是學無學二千人不唯然已見阿難是諸人等當供養五十世界微塵數諸佛如來恭敬尊重護持法藏末後同時於十方國各得成

佛皆同一號名曰寶相如來應供正徧知明行足善
逝世間解無上士調御丈夫天人師佛世尊壽命一
劫國土莊嚴聲聞菩薩正法像法皆悉同等尔時世
尊欲重宣此義而說偈言

是二千聲聞今於我前住悉皆與授記未來當成佛
所供養諸佛如上說塵數護持其法藏後當成正覺
各於十方國悉同一名號俱時坐道場以證無上慧
皆名爲寶相國土及弟子正法與像法悉等無有異
咸以諸神通度十方衆生名聞普周徧漸入於涅槃
爾時學無學二千人聞佛授記歡喜踊躍而說偈言
世尊慧燈明我聞授記音心歡喜充滿如甘露見灌

論曰羅睺羅者佛之子也初佛爲太子時將出家
以白其父淨飯王王不可太子懇求不已三曰若
汝有子聽汝所求於是太子以指指耶輸之腹而
言曰却後六年汝當生男果如所期而生故名覆
障太子夜踰牆而去耶輸乃娠諸釋氏以爲不祥
欲治而殺之賴寶女劬毗羅證之止旣生羅睺羅
終不能自明抱而臨大火聚曰我若爲非子母俱
焚不然天當作證卽趨而入於是火聚化而爲蓮
池國人疑謗乃息佛旣成道還歸本國耶輸遣羅
睺羅以果奉獻羅睺羅恃其幼稚於萬衆中徑持
上佛佛欣然受之淨飯王曰吾兒入道而吾孫如

此亦可以紹金輪之位復何恨哉及長佛令出家
耶輸鍾愛之藏於高樓大目捷連飛空携之而去
使師事舍利弗爲弟子在沙彌中膽氣逸群好誕
語國王大臣婆羅門居士有來親近佛者羅睺羅
必詒之曰佛不在令無量人不得見佛佛呵之嘗
使濯足因三覆其盆曰汝何不注水荅曰盆覆不
能注也佛言汝好誕如覆盆於佛法中法水不留
自今當實語也久之求道無所得以問佛佛言汝
爲人說五陰空未曰未也佛曰當爲人說說竟又
問佛佛言汝爲人說十二入未說十八界未說法
是得道之門若欲得道當爲他說說竟自當得道

後果得道見愛皆除三界生盡今佛授記汝於來
世當得作佛號蹈七寶華如來壽量國土與阿難
得果同蓋因其宗同然其獨得號佛長子耳

無盡居士論曰阿難成佛曰山海慧自在通王羅
睺羅成佛號蹈七寶華學無學二千人成佛同一
號曰寶相五百羅漢同號普明二千學無學同號
寶相圭峯所謂河沙諸佛入我身我身徧入河沙
佛亦如二萬佛同號日月燈明也問曰未也佛
何授記之多乎曰覺體徧周佛身充滿入其名數
已是隨宜若不如斯誰復修證以其供養奉事種
種莊嚴之具推之相雖有而不著性雖空而不斷

珍而至貴者寶也剛而不壞者金也淨而無垢者珠也熏而普聞者香也摧邪不動者幢也立正表勝者幡也舒而垂蔭者蓋也開敷而麗者華也凝結而實者果也塔廟者應身之所在也瓔珞者報身之所賁也或三或五或六或七或八至於百千萬億內不出乎三十七助道品所行之行外不出乎三十七助道品所依之報也一蒙佛記成佛不虛此所以佛出難值如優曇鉢華時一現耳

妙法蓮華經法師品第十

爾時世尊因樂王菩薩告八萬大士藥王汝見是人衆中無量諸天龍王夜叉乾闥婆阿脩羅迦樓羅緊

那羅摩睺羅伽人與非人及比丘比丘尼優婆塞優婆夷求聲聞者求辟支佛者求佛道者如是等類咸於佛前聞妙法華經一偈一句乃至一念隨喜者我皆與授記當得阿耨多羅三藐三菩提佛告藥王又如來滅度之後若有人聞妙法華經乃至一偈一句一念隨喜者我亦與授阿耨多羅三藐三菩提記若復有人受持讀誦解說書寫妙法華經乃至一偈於此經卷敬視如佛種種供養華香瓔珞末香塗香燒香繒蓋幢幡衣服伎樂乃至合掌恭敬藥王當知是諸人等已曾供養十萬億佛於諸佛所成就大願愍衆生故生此人間藥王若有人問何等衆生於未來

世當得作佛應示是諸人等於未來世必得作佛何以故若善男子善女人於法華經乃至一句受持讀誦解說書寫種種供養經卷華香瓔珞抹香塗香燒香繒蓋幢幡衣服伎樂合掌恭敬是人一切世間所應瞻奉應以如來供養而供養之當知此人是大菩薩成就阿耨多羅三藐三菩提哀愍衆生願生此間廣演分別妙法華經何況盡能受持種種供養者藥王當知是人自捨清淨業報於我滅度後愍衆生故生於惡世廣演此經若是善男子善女人我滅度後能竊爲一人說法華經乃至一句當知是人則如來使如來所遣行如來事何況於大衆中廣爲人說藥

王若有惡人以不善心於一切中現於佛前常毀罵佛其罪尚輕若人以一惡言毀咎在家出家讀誦法華經者其罪甚重藥王其有讀誦法華經者當知是人以佛莊嚴而自莊嚴則爲如來肩所荷擔其所至方應隨向禮一心合掌恭敬供養尊重讚歎華香瓔珞末香塗香燒香繒蓋幢幡衣服肴饌作諸技樂人中上供而供養之應持天寶而以散之天上寶聚應以奉獻所以者何是人歡喜說法須臾聞之卽得究竟阿耨多羅三藐三菩提故爾時世尊欲重宣此義而說偈言

若欲住佛道成就自然智常當勤供養受持法華者

其有欲疾得一切種智慧當受持是經并供養持者
若有能受持妙法華經者當知佛所使愍念諸衆生
諸有能受持妙法華經者捨於清淨土愍衆故生此
當知如是人自在所欲生能於此惡世廣說無上法
應以天華香及天寶衣服天上妙寶聚供養說法者
吾滅後惡世能持是經者當合掌禮敬如供養世尊
上饌衆甘美及種種衣服供養是佛子冀得須臾聞
若能於後世受持是經者我遣在人中行於如來事
若於一劫中常懷不善心作色而罵佛獲無量重罪
其有讀誦持是法華經者須更加惡言其罪復過彼
有人求佛道而於一劫中合掌在我前以無數偈讚

由是讚佛故得無量功德歎美持經者其福復過彼
於八十億劫以最妙色聲及與香味觸供養持經者
如是供養已若得須臾聞則應自欣慶我今獲大利
藥王今告汝我所說諸經而於此經中法華最第一
論曰脩多羅有觀照二門是妙方便如曰一念普
觀無量劫無去無來亦無住如是了知三世事超
諸方便成十力又曰照心無體則境無所起心境
總無業體便謝唯普光明智無暗無明卽無明滅
十二虛妄緣滅故凡言於此經受持讀誦書寫演
說者觀照方便之謂也經言於法華經乃至一句
受持讀誦解說書寫種種供養乃至哀愍衆生願

生此間廣演分別妙法華經何況能受持種種供養者欲已悟一佛乘者常以如來知見之力觀照之耳問曰但無情見大智逾明萬法體真無轉變相者一佛乘知見也而觀照方便耳亦可施於一佛乘乎曰情見餘習未除則觀照豈可捨也華嚴論曰十住初心便明見道若有餘習則以如來知見而淨治之非別有法與之對治但是知見則無念而知無念而知則愛惡自然淡薄悲智自然增明業障自然壞滅功行自然圓成如是受持佛所護念者故經言若善男子善女人我滅度後能竊爲一人說法華經乃至一句當知是人則如來使

如來所遣行如來事也

爾時佛復告藥王菩薩摩訶薩我所說經典無量千萬億已說今說當說而於其中此法華經最爲難信難解藥王此經是諸佛祕要之藏不可分布妄受與人諸佛世尊之所守護從昔已來未曾顯說而此經者如來現在猶多怨嫉况滅度後藥王當知如來滅後其能書持讀誦供養爲他人說者如來則爲以承覆之又爲他方現在諸佛之所護念是人有大信力及志願力諸善根力當知是人與如來共宿則爲如來手摩其頭

論曰經文前段教以如來知見之力常在現行今

此教以於怨嫉之世堪能忍受故經言如來則爲
以衣覆之衣者柔和忍辱是也夫了知自心之外
無有一法是謂大信力將以此法普施衆生是謂
志願之力以戒定慧觀照方便以隨順之是謂諸
善根力始從凡夫衆生之地至獲披如來之衣而
佛同室其親近隨順之至者歟故經言當知是人
與如來共宿則爲如來手摩其頭也迦那提婆嘗
以無礙辯才折困諸外道論師已而經行林間爲
外道弟子刀決其腹曰汝以口舌困我師我則以
刀困汝汝復能神乎於是提婆五臟委地然命未
絕謂曰吾有三衣鉢具在禪室汝急持以遁我弟

子未得法忍者將害汝汝未得法利惜身情重惜
名次之夫身與名爲有生之累今汝狂心所欺忿
毒所燒罪報未已痛泣受之受之者實自無主爲
之者實自無人無人無主哀酷者誰以實求之實
不可得而昧者爲狂癡顛倒所惑見得之心著已
膠固而有我人苦樂也俄衆弟子至驚仆叫然而
慟聲震山谷提婆曰諸法之實誰怨誰酷誰割誰
截諸法之實實無受者誰爲怨賊汝爲癡毒所欺
妄生著見而號呼也寧知彼人所害害諸善報非
害我也言卒而逝若迦那提婆則能受如來所覆
之衣者也

藥王在在處處若說若讀若誦若書若經卷所住之處皆應起七寶塔極令高廣嚴飾不須復安舍利所以者何此中已有如來全身

論曰前文佛教以於怨嫉之世當披柔和忍辱之衣以對治憎妒違害之緣此緣非自然而有以有我人之相故生也方便以法對治如施藥治病病瘡則藥弃未見從來無病之意經言藥王在在處處若說若讀若誦若書若經卷所住之處皆應起七寶塔者非苟以爲言也塔有寂滅之象示一切寂滅也一切寂滅則寧有怨嫉之世柔和忍辱之衣乎問曰何以知言塔者爲寂滅之象耶曰華嚴

經曰鞞瑟胝羅居士常供養栴檀座佛塔釋者曰栴檀止蛇虺熱毒智慧解脫之香消一切衆生熱惱塔者佛形像所在今特設座而已空慧不滅解脫之門也又曰文殊師利化入人間覺城東大塔廟處轉說此經躡普照法界脩多羅經釋者曰塔寂滅之處故必言大塔廟者示心體究竟寂滅也前言塔者佛形像所在此言塔寂滅之處則形像而寂滅非斷滅也經言起七寶塔極令高廣嚴飾不須復安舍利者七寶嚴飾福相也不須復安舍利智相也以福嚴智非斷滅之旨也故經言是中
有如來全身

此塔應以一切華香瓔珞繒蓋幢幡伎樂歌頌供養
恭敬尊重讚歎若有人得見此塔禮拜供養當知是
等皆近阿耨多羅三藐三菩提藥王多有人在家出
家行菩薩道若不能得見聞讀誦書持供養是法華
經者當知是人未善行菩薩道若有得聞是經典者
乃能善行菩薩之道其有衆生求佛道者若見若聞
是法華經聞已信解受持者當知是人得近阿耨多
羅三藐三菩提藥王譬如有人渴乏須水於彼高原
穿鑿求之猶見乾土知水尚遠施功不已轉見濕土
遂漸至泥其心決定知水必近菩薩亦復如是若未
聞未解未能修習是法華經當知是人去阿耨多羅

三藐三菩提尚遠若得聞解思惟修習必知得近阿
耨多羅三藐三菩提所以者何一切菩薩阿耨多羅
三藐三菩提皆屬此經此經開方便門示真實相是
法華經藏深固幽遠無人能到今佛教化成就菩薩
而爲開示藥王若有菩薩聞是法華經驚疑怖畏當
知是爲新發意菩薩若聲聞人聞是經驚疑怖畏當
知是爲增上慢者藥王若有善男子善女人如來滅
後欲爲四衆說是法華經者云何應說是善男子善
女人入如來室著如來衣坐如來座爾乃應爲四衆
廣說斯經如來室者一切衆生中大慈悲心是如來
衣者柔和忍辱心是如來座者一切法空是安住是

中然後以不懈怠心爲諸菩薩及四衆廣說是法華
經藥王我於餘國遣化人爲其集聽法衆亦遣化比
丘比丘尼優婆塞優婆夷聽其說法是諸化人聞法
信受隨順不逆若說法者在空閑處我時廣遣天龍
鬼神乾闥婆阿脩羅等聽其說法我雖在異國時時
令說法者得見我身若於此經忘失句逗我還爲說
令得具足尔時世尊欲重宣此義而說偈言

欲捨諸懈怠應當聽此經是經難得聞信受者亦難
如人渴須水穿鑿於高原猶見乾燥土知去水尚遠
漸見濕土泥決定知近水藥王汝當知如是諸人等
不聞法華經去佛智甚遠若聞是深經決了聲聞法

是諸經之王聞已諦思惟當知此人等近於佛智慧
若人說此經應入如來室著於如來衣而坐如來座
處衆無所畏廣爲分別說大慈悲爲室柔和忍辱不
諸法空爲座處此爲說法若說此經時有人惡口罵
加刀杖瓦石念佛故應忍我千萬億土現淨堅固身
於無量億劫爲衆生說法若我滅度後能說此經者
我遣化四衆比丘比丘尼及清信士女供養於法師
引導諸衆生集之令聽法若人欲加惡刀杖及瓦石
則遣變化人爲之作衛護若說法之人獨在空閑處
寂寞無人聲讀誦此經典我尔時爲現清淨光明身
若忘失章句爲說令通利若人具是德或爲四衆說

空處讀誦經皆得見我身若人在空閑我遣天龍王
夜叉鬼神等爲作聽法衆是人樂說法分別無罣礙
諸佛護念故能令大衆喜若親近法師速得菩薩道
隨順是師學得見恒沙佛

論曰經言此經深固幽遠無人能到則諸佛自住
三摩之地秘密神通之藏也唯其無人能到故聞
者驚怖疑謗然則終不可以開悟衆生乎曰爲根
熟衆生設象以示之如曰在在處處若說若讀若
誦若書若經卷所住處皆應起七寶塔極令高廣
嚴飾不須復安舍利所以者何此中已有如來全
身者使之自悟自見不藉以語言文字也故經曰

此經開方便門示真實相者謂是故也若根未熟
衆生則當廣說恐譬喻言辭於敷演時致諸疑謗
如曰若說此經時有人惡口罵加刀杖瓦石念佛
故應忍故佛曲折付囑曰應爲四衆廣說斯經當
入如來室如來室者一切衆生中大慈悲心是當
著如來衣如來衣者柔和忍辱心是當坐如來座
如來座者一切法空是所言室者歸宿之地坐者
寢處之所衣者嚴飾之儀盖日用經行宴坐俯仰
談笑於此者也故經曰安住是中然後以不懈怠
心爲諸菩薩及四衆廣說法華經者謂是故也
無盡居士論曰聲聞弟子授記作佛則不疑矣諸

天龍王夜叉乾闥婆阿脩羅迦樓羅緊那羅摩睺
羅伽人非人如是等類皆與授記何也曰是皆圍
繞佛會聽法之衆非有恭敬心歡喜心信受心隨
順心則豈能在此佛不云乎我滅度後能竊爲一
人說法華經乃至一句當知是人則如來使如來
所遣行如來事又曰若人在空閑我遣天龍王夜
叉鬼神等爲作聽法衆以此佛語審諦推尋則我
等人趣也所知者人趣而已佛以一音演說法衆
生隨類各得解則天龍鬼神沈幽愁之苦鳥獸懷
曰脩羅方曠諸天正樂鬼神沈幽愁之苦鳥獸懷
猶狘之悲整心慮趣菩提唯人能爲裴休之言讚

圓覺經則美矣於諸佛之慈悲智願無量無邊未
之盡也經曰若有人聞此經一偈一句一念隨喜
我亦與授阿耨多羅三藐三菩提記一念者非異
非如之念也苟能如是隨順如是歡喜則究竟成
佛如穿鑿高原漸見濕潤決知近水無可疑者佛
滅度後親近法師隨順師學則去佛也何遠之有
妙法蓮華經見寶塔品第十一

爾時佛前有七寶塔高五百由旬縱廣二百五十由
旬從地湧出住在空中種種寶物而裝校之五千欄
楯龕室千萬無數幢幡以爲嚴飾垂寶瓔珞寶鈴萬
億而懸其上四面皆出多摩羅跋栴檀之香充遍世

界其諸幡蓋以金銀琉璃碑磔瑪瑙真珠玫瑰七寶
合成高至四天王宮三十三天雨天界陀羅華供養
寶塔餘諸天龍夜叉乾闥婆阿脩羅迦樓羅緊那羅
摩睺羅伽人非人等千萬億衆以一切華香瓔珞幡
蓋伎樂供養寶塔恭敬尊重讚歎尔時寶塔中出大
音聲歎言善哉善哉釋迦牟尼世尊能以平等大慧
教菩薩法佛所護念妙法華經爲大衆說如是如是
釋迦牟尼世尊如所說者皆是真實尔時四衆見大
寶塔住在空中又聞塔中所出音聲皆得法喜怪未
曾有從座而起恭敬合掌却住一面爾時有菩薩摩
訶薩名大樂說知一切世間天人阿脩羅等心之所

疑而白佛言世尊以何因緣有此寶塔從地涌出又
於其中發是音聲爾時佛告大樂說菩薩此寶塔中
有如來全身乃往過去東方無量千萬億阿僧祇世
界國名寶淨彼中有佛號曰多寶其佛行菩薩道時
作大誓願若我成佛滅度之後於十方國土有說法
華經處我之塔廟爲聽是經故涌現其前爲作證明
讚言善哉彼佛成道已臨滅度時於天人大衆中告
諸比丘我滅度後欲供養我全身者應起一大塔其
佛以神通願力十方世界在在處處若有說法華經
者彼之寶塔皆涌出其前全身在於塔中讚言善哉
善哉大樂說今多寶如來塔聞說法華經故從地涌

出讚言善哉善哉

論曰如經言爾時寶塔中出大音聲讚言善哉善哉乃至釋迦牟尼世尊如所說者皆是真實此大音聲以爲多寶佛所說也邪則多寶佛爲過去滅度之佛不應能出音聲也以爲寶塔能說也邪則塔無舌根既無舌根不應能說也而經又言我此塔廟爲聽是經故湧現其前以爲多寶佛能聽經也邪則多寶佛爲過去滅度之佛滅度之佛不應能聽經也以爲塔廟能聽也邪則塔無耳根既無耳根不應能聽經也以是觀之則知說而無說聞而無聞而於衆生現行分別煩惱之中卽是如來

涅槃常寂滅相也問曰寶塔之湧現高廣嚴飾必非苟然其旨可得聞乎曰天親菩薩曰塔言高五百由旬者示一切佛土清淨勝出世間善根所生故何以故以其大而淨故若世間善根生者非淨而小故佛地經曰勝出世間善根所起則五者五根也百者百行也以百行資五根以成故高五趣縱廣二百五十由旬則橫出二十五有破凡夫常見之執故言從地湧出破外道斷見之無故言住於空中至以衆寶莊校而飾以欄楯龕室之妙鳴以寶鈴瓔珞之音則皆衆善之成就萬德莊嚴也是時大樂說菩薩以如來神力故白佛言世尊我等

願欲見此佛身佛告大樂說菩薩摩訶薩是多寶佛
有深重願若我寶塔爲聽法華經故出於諸佛前時
其有欲以我身示四衆者彼佛分身諸佛在於十方
世界說法盡還集一處然後我身乃出現耳

論曰如經言多寶佛有深重願若我寶塔爲聽法
華經故出現諸佛前其有欲以我身示四衆者彼
佛分身諸佛在於十方世界則是多寶佛所分之
身也及觀下文乃曰爾時釋迦牟尼所分之身次
弟來集釋迦牟尼見所分之身悉已來集卽時一
切衆會皆見多寶如來於彼塔中坐師子座全身
不散如入禪定且法身尚無彼此迭相見之義豈

有釋迦分身集而今多寶全身出現乎此佛寓其
意於事法之中使學者觀象而自求之然竟莫有
知者起信論曰若心馳散卽當攝來住於正念是
正念者當知唯心無外境界所言若心馳散卽當
攝來住於正念則十方分身來集之旨也所言是
正念者唯心無外境界則全身不散如入禪定之
旨也使釋迦牟尼所分之身來集多寶如來全身
出現非以象論則是外道譏亂邪說豈一佛乘之
教法乎舊疏曰此以顯多寶釋迦同塔二身無差
別故十方分身佛集身無異故彼身卽我身故是
大不然九十六種之論也

大樂說我分身諸佛在於十方世界說法者今應當
集大樂說白佛言世尊我等亦願欲見世尊分身諸
佛禮拜供養爾時佛放白毫一光卽見東方五百萬
億那由他恒河沙等國土諸佛彼諸國土皆以玻瓈
爲地寶樹寶衣以爲莊嚴無數千萬億菩薩充滿其
中徧張寶幢寶網羅上彼國諸佛以大妙音而說諸
法及見無量千萬億菩薩徧滿諸國爲衆說法南西
北方四維上下白毫相光所照之處亦復如是爾時
十方諸佛各告衆菩薩言善男子我今應往娑婆世
界釋迦牟尼佛所并供養多寶如來寶塔
論曰佛以白毫一光爲廣長舌徧滿十方以呼召

一切分身之佛此何意哉起信論曰一切諸法本
來唯心實無於念而有妄心不覺念起見諸境界
故說無明心性不起卽是大智慧光明義故若心
起見則有不見之相心性離見卽是徧照法界義
故蓋此毫光離念離見之象也不以象論則佛放
眉間白毫相光已照東方萬八千土矣其光未收
今又放白毫一光何也學者當深觀之經曰爾時
十方諸佛各告菩薩言善男子我今應往娑婆世
界釋迦牟尼佛所此何意哉華嚴經偈曰華藏世
界所有塵一一塵中見法界寶光現佛如雲集此
是如來刹自在此蓋心心爾念念爾塵塵爾刹刹

爾皆融攝歸於自心之象也不以象論則釋迦分身多寶全身不應同故大哉出情無比之法成佛必由之門而學者以義理求則過矣

時娑婆世界卽變清淨琉璃爲地寶樹莊嚴黃金爲繩以界八道無諸聚落村營城邑大海江河山川林藪燒大寶香曼陀羅華徧布其地以寶網幔羅覆其上懸諸寶鈴唯留此會衆移諸天人置於他土是時諸佛各將一大菩薩以爲侍者至娑婆世界各到寶樹下一一寶樹高五百由旬枝葉華果次第莊嚴諸寶樹下皆有師子之座高五百由旬亦以大寶而校飾之爾時諸佛各於此座結加趺坐如是展轉徧滿

三千大千世界而於釋迦牟尼佛一方所分之身猶故未盡時釋迦牟尼佛欲容受所分身之佛故八方各更變二百萬億那由他國皆令清淨無有地獄餓鬼畜生及阿脩羅又移諸天人置於他土所化之國亦以琉璃爲地寶樹莊嚴樹高五百由旬枝葉華果次第嚴飾樹下皆有寶師子座高五由旬種種諸寶以爲莊校亦無大海江河及目真鄰陀山摩訶目真鄰陀山鐵圍山大鐵圍山須彌山等諸山王通爲一佛國土寶地平正寶交露幔徧覆其上懸諸旛蓋燒大寶香諸天寶華徧布其地釋迦牟尼佛爲諸佛當來坐故復於八方各更變二百萬億那由他國皆令

清淨無有地獄餓鬼畜生及阿脩羅又移諸天人置於他土所化之國亦以琉璃爲地寶樹莊嚴樹高五百由旬枝葉華果次第莊嚴樹下皆有寶師子座高五由旬亦以大寶而校飾之亦無大海江河及目真鄰陀山摩訶目真鄰陀山鐵圍山大鐵圍山須彌山等諸山王通爲一佛國土寶地平正寶交露幔徧覆其上懸諸幡蓋燒大寶香諸天寶華徧布其地

論曰自時娑婆世界卽變清淨乃至十方所分之身猶故未盡爲初變淨土又自時釋迦牟尼佛欲容受所分身諸佛乃至諸天寶華徧布其地爲中變淨土又自釋迦牟尼佛爲諸佛當來坐故乃至

諸天寶華徧布其地爲終變淨土問曰佛於三變淨土何意哉曰亦象也破凡夫衆生無明煩惱麤細之相也初變娑婆之穢土爲衆寶嚴淨之境是凡夫執相應染所謂麤中之粗者也中變二百萬億那由他之境爲廣大清淨之土是勝妙轉變自在所謂細中之麤者也終變二百萬億那由他之境爲微妙無礙之土是一切處解脫自在所謂細中之細者也問曰三變淨土之旨已歸迷悶更聞麤細之論茫然自失願詳開示曰首楞嚴經曰緣妄有生因生有滅生滅名妄滅妄名真夫分別生滅之相未盡則名未見性故佛三變淨土者示無

明煩惱生滅微細之相使學者知其體性耳起信
論曰分別生滅相者有二種云何爲二一者麤與
心相應故二者細與心不相應故又麤中之麤凡
夫境界麤中之細及細中之麤菩薩境界細中之
細是佛境界釋之者曰無明過患六種染心前三
種麤後三種細前三種者一執相應染二不斷相
應染三分別智相應染言凡夫之境爲麤中之麤
者就三種麤染中執相應染尤麤故也若不斷相
應染及分別智相應染二種爲麤中之稍細者也
言菩薩境界爲細中之麤者以現色不相應染及
能見心不相應染根本業不相應染此三種皆爲

細於現色不相應染及能見心不相應染同是不
相應故名爲細獨其後根本業識麤故名細中之
麤也如佛境界則細中之細蓋根本業不相應染
能所未分則行相極細唯佛能了耳舊疏曰初變
大千表至聲聞次變二百萬億那由他國土表至
獨覺後更變二百者表出二乘至一乘位極滿故
失經之旨爲甚不可信也

爾時東方釋迦牟尼所分之身百千萬億那由他恒
河沙等國土中諸佛各各說法來集於此如是次第
十方諸佛皆悉來集坐於八方爾時一方四百萬
億那由他國土諸佛如來徧滿其中是時諸佛各在

寶樹下坐師子座皆遣侍者問訊釋迦牟尼佛各齎
寶華滿掬而告之言善男子汝往詣耆闍崛山釋迦
牟尼佛所如我辭曰少病少惱氣力安樂及菩薩聲
聞衆悉安隱不以此寶華散佛供養而作是言彼某
甲佛與欲開此寶塔諸佛遣使亦復如是爾時釋迦
牟尼佛見所分身佛悉已來集各各坐於師子之座
皆聞諸佛與欲同開寶塔卽從座起住虛空中一切
四衆起立合掌一心觀佛於是釋迦牟尼佛以右指
開七寶塔戶出大音聲如却關鑰開大城門卽時一
切衆會皆見多寶如來於寶塔中生師子座全身不
散如入禪定又聞其言善哉善哉釋迦牟尼佛快說

是法華經我爲聽是經故而來至此爾時四衆等見
過去無量千萬億劫滅度佛說如是言歎未曾有以
天寶華聚散多寶佛及釋迦牟尼佛上爾時多寶佛
於寶塔中分半座與釋迦牟尼佛而作是言釋迦牟
尼佛可就此座卽時釋迦牟尼佛入其塔中坐其半
座結加趺坐爾時大衆見二如來在七寶塔中師子
座上結加趺坐各作是念佛坐高遠惟願如來以神
通力令我等輩俱處虛空卽時釋迦牟尼佛以神通
力接諸大衆皆在虛空以大音聲普告四衆誰能於
此娑婆國土廣說妙法華經付囑有在尔時世尊欲
重宣此義而說偈言

聖王世尊雖久滅度在寶塔中尚爲法來諸人云何不勤爲法此佛滅度無央數劫處處聽法以難遇故彼佛本願我滅度後在在所往常爲聽法又我分身無量諸佛如恒沙等來欲聽法及見滅度多寶如來各捨妙土及弟子衆天人龍神諸供養事令法久住故來至此爲坐諸佛以神通力移無量衆令國清淨諸佛各各詣寶樹下如清淨池蓮華莊嚴其寶樹下諸師子座佛坐其上光明嚴飾如夜暗中然大炬火身出妙香徧十方國衆生蒙熏喜不自勝譬如大風吹小樹枝以是方便令法久住告諸大衆我滅度後誰能護持讀說斯經今於佛前自說誓言其多寶佛

雖久滅度以大誓願而師子吼多寶如來及與我身所集化佛當知此意諸佛子等誰能護法當發大願令得久住其有能護此經法者則爲供養我及多寶此多寶佛處於寶塔常遊十方爲是經故亦復供養諸來化佛莊嚴光飾諸世界者若說此經則爲見我多寶如來及諸化佛諸善男子各諦思惟此爲難事宜發大願諸餘經典數如恒沙雖說此等未足爲難若接須彌擲置他方無數佛土亦未爲難若以足指動大千界遠擲他國亦未爲難若立有頂爲衆演說無量餘經亦未爲難若佛滅後於惡世中能說此經是則爲難假使有人手把虛空而以遊行亦未爲難

於我滅後若自書持若使人書是則爲難若以大地
置足甲上升於梵天亦未爲難佛滅度後於惡世中
整讀此經是則爲難假使劫燒擔負乾草入中不燒
亦未爲難我滅度後若持此經爲一人說是則爲難
若持八萬四千法藏十二部經爲人演說令諸聽者
得六神通雖能如是亦未爲難於我滅後聽受此經
問其義趣是則爲難若人說法令千萬億無量無數
恒沙衆生得阿羅漢具六神通雖有是益亦未爲難
於我滅後若能奉持如斯經典是則爲難我爲佛道
於無量土從始至今廣說諸經而於其中此經第一
若有能持則持佛身諸善男子於我滅後誰能受持

讀誦此經今於佛前自說誓言此經難持若甞持者
我則歡喜諸佛亦然如是之人諸佛所歎是則勇猛
是則精進是名持戒行頭陀者則爲疾得無上佛道
能於來世讀持此經是真佛子住淳善地佛滅度後
能解其義是諸天人世間之眼於恐畏世能須臾說
一切天人皆應供養

論曰經前文所叙七寶塔中有佛全身者雖示寂
滅之體而未見寂滅非斷滅之意故又叙能出大
音聲讚歎釋迦牟尼佛能以平等大慧教菩薩法
也既已明寂滅非斷滅矣又未見五蘊緣生之身
皆證之意故經言一切衆生皆見多寶如來於寶

塔中坐師子座全身不散如入禪定又聞其言善哉善哉釋迦牟尼佛快說是法華經我爲聽是經故而來至此爾時四衆見過去無量千萬億劫滅度佛說如是言歎未曾有以天寶華聚散多寶佛及釋迦牟尼佛而作是言釋迦牟尼佛可就此座卽時釋迦牟尼佛入其塔中坐其半座也何以知之曰旣言過去無量千萬億劫滅度佛矣而曰能聽經能讚歎釋迦牟尼佛又入其塔與之並座而坐皆可疑也曰何疑哉曰多寶如來久已滅度則寂滅體也釋迦牟尼佛正當出世則緣生佛也今寂滅者聽經讚歎則爲緣生者之事緣生者入于

塔中並座而坐則爲寂滅者之相以是知其示五蘊緣生之身皆證也

無盡居士論曰前佛後佛皆以教菩薩法說妙法華經已次第授記古佛過去久已是事可信耶於是佛前有七寶塔從地湧出住虛空中高至三十三天塔中出大音聲歎言善哉善哉釋迦牟尼佛能爲大衆說妙法華經以開示言之則塔中久滅度佛多寶如來全身是也以悟入言之塔從地涌住虛空中高至梵天則平等自在無有高下也出大音聲則滅而非滅也久滅之身四衆願見必待十方分身之佛集歸一佛然後出現則一多相卽

也變八方爲清淨移諸天於他土多寶分半座與釋迦佛大衆見二如來佛座高遠惟願如來以神通力令我等輩俱處虛空佛接以神力皆在空中以大音聲普告四衆如來不久當入涅槃欲以妙法華經付囑有在我滅度後誰能護持自說誓言以此觀之情存垢淨則此土他方見起凡聖則佛座高遠於斯悟入性相歷然將入涅槃夫復何慮或曰佛說往古日月燈明多寶諸佛何其佛之多名也曰莊子云容或氏大庭氏柏皇氏中央氏栗陸氏驪畜氏赫胥氏管仲云封泰山禪梁父者七十二君子能以傳記之所聞攷之乎子以爲駕說

乎

妙法蓮華經提婆達多品第十二

爾時佛告諸菩薩及天人四衆吾於過去無量劫中求法華經無有懈倦於多劫中常作國王發願求於無上菩提心不退轉爲欲滿足六波羅蜜勤行布施心無吝惜象馬七珍國城妻子奴婢僕從頭目髓腦身肉手足不惜軀命時世人民壽命無量爲於法故捐捨國位委政太子擊鼓宣令四方求法誰能爲我說大乘者吾當終身供給走使時有仙人來白王言我有大乘名妙法華經若不違我當爲宣說王聞仙言歡喜踊躍卽隨仙人供給所須採果汲水拾薪設

食乃至以身而爲床座身心無倦于時奉事經于千
歲爲於法故精勤給侍令無所乏爾時世尊欲重宣
此義而說偈言

我念過去劫爲求大法故雖作世國王不貪五欲樂
椎鐘告四方誰有大法者若爲我解說身當爲奴僕
時有阿私仙來白於大王我有微妙法世間所希有
若能修行者吾當爲汝說時王聞仙言心生大喜悅
卽便隨仙人供給於所須採薪及果蔬隨時恭敬與
情存妙法故身心無懈倦普爲諸衆生勤求於大法
亦不爲己身及以五欲樂故爲大國王勤求獲此法
遂至得成佛今故爲汝說

佛告諸比丘爾時王者則我身是時仙人者今提婆
達多是由提婆達多善知識故令我具足六波羅蜜
慈悲喜捨三十二相八十種好紫磨金色十力四無
所畏四攝法十八不共神通道力成等正覺廣度衆
生皆因提婆達多善知識故告諸四衆提婆達多却
後過無量劫當得成佛號曰天王如來應供正徧知
明行足善逝世間解無上士調御丈夫天人師佛世
尊世界名天道時天王佛住世二十中劫廣爲衆生
說於妙法恒河沙衆生得阿羅漢果無量衆生發緣
覺心恒河沙衆生發無上道心得無生忍至不退轉
時天王佛般涅槃後正法住世二十中劫全身舍利

起七寶塔高六十由旬縱廣四十由旬諸天人民悉以雜華末香燒香塗香衣服瓔珞幢旛寶蓋伎樂歌頌禮拜供養七寶妙塔無量衆生得阿羅漢果無量衆生悟辟支佛不可思議衆生發菩提心至不退轉佛告諸比丘未來世中若有善男子善女人聞妙法華經提婆達多品淨心信敬不生疑惑者不墮地獄餓鬼畜生生十方佛前所生之處常聞此經若生人中受勝妙樂若在佛前蓮華化生

論曰提婆達多此言天熱生時人天心皆熱故以爲名斛飯王之子佛之從弟初其母禱天而娠亦名天授然其行逆方佛化被大千含識者必敬信

而提婆達多獨害之以毒藏十指甲見佛接足而禮佛足不傷而指自壞不勝其忿教阿闍世王放五百護財醉象以衝佛之駕佛以手示之醉象見佛十指皆現師子伏地驚懼遺糞而去因嗜酥多食頭痛呻吟佛遙聞憐之引手爲摩其頭痛卽止大喜曰何從得此長手邪熟視之知爲佛手乃又大怒蓮華色比丘見之無故又大怒以拳歐之至死佛呵誨之終不悛嘗破僧領五百比丘欲爲已徒衆將去之舍利弗厭之睡睡熟而大目犍連以手擎之以往旣覺大怒誓報之乃以大石抵佛石長三十肘廣十五肘地神手遮之石碎迸其小者

中佛足流血其五逆大罪皆此類佛終悲愴之今
獲授記作佛彌天王如來所御世界名曰天道而
已劫名國名殊勝之報皆所不言何也曰豈有形
曲而影直者邪隋僧智顛曰此經至震旦凡四譯
今所盛行者兩本西晉天竺僧法護所譯名正法
華而護又能敷演僧道安法太所承稟者也後秦
龜茲僧童壽所譯名妙法蓮華蓋弘始八年也壽
亦能敷演而其門弟子僧叡繼其席開爲九喻有
二十八品而此一品爲宮嬪所留江東所傳止二
十七品耳梁僧曇滿講一百徧以此品列持品之
前乃於長沙焚身報法之恩陳僧慧思於經三生

妍究以此品次寶塔品之後後獲法護所譯若合
符契也

於時下方多寶世尊所從菩薩名曰智積白多寶佛
當還本土釋迦牟尼佛告智積曰善男子且待須臾
此有菩薩名文殊師利可與相見論說妙法可還本
土爾時文殊師利坐千葉蓮華大如車輪俱來菩薩
亦坐寶蓮華從於大海娑竭羅龍宮自然涌出住虛
空中詣靈鷲山從蓮華下至於佛所頭面禮敬二世
尊足脩敬已畢往智積所共相慰問却坐一面智積
菩薩問文殊師利仁往龍宮所化衆生其數幾何文
殊師利言其數無量不可稱計非口所宣非心所測

且待須臾自當證知所言未竟無數菩薩坐寶蓮華
從海涌出詣靈鷲山住在虛空此諸菩薩皆是文殊
師利之所化度具菩薩行皆共論說六波羅蜜本聲
聞人在虛空中說聲聞行今皆修行大乘空義文殊
師利謂智積曰於海教化其事如是爾時智積菩薩
以偈讚曰

大智德勇健化度無量衆今此諸大會及我皆已見
演暢實相義開闡一乘法廣導諸衆生令速成菩提
文殊師利言我於海中唯常宣說妙法華經智積問
文殊師利言此經甚深微妙諸經中寶世所希有願
有衆生勤加精進修行此經速得佛不文殊師利言

有娑竭羅龍王女年始八歲智慧利根善知衆生諸
根行業得陀羅尼諸佛所說甚深秘藏悉能受持深
入禪定了達諸法於剎那頃發菩提心得不退轉辯
才無礙慈念衆生猶如赤子功德具足心念口演微
妙廣大慈悲仁讓志息和雅能至菩提智積菩薩言
我見釋迦如來於無量劫難行苦行積功累德求菩
提道未曾止息觀三千大千世界乃至無有如芥子
許非是菩薩捨身命處爲衆生故然後乃得成菩提
道不信此女於須臾頃便成正覺言論未訖時龍王
女忽現於前頭面禮敬却住一面以偈讚曰
深達罪福相徧照於十方微妙淨法身具相三十二

以八十種好用莊嚴法身天人所戴仰龍神咸恭敬
一切衆生類無不宗奉者又聞成菩提唯佛當證知
我聞大乘教度脫苦衆生

時舍利弗語龍女言汝謂不久得無上道是事難信
所以者何女身垢穢非是法器云何能得無上菩提
佛道懸曠經無量劫勤苦積行具修諸度然後乃成
又女人身猶有五障一者不得作梵天王二者帝釋
三者魔王四者轉輪聖王五者佛身云何女身速得
成佛尔時龍女有一寶珠價直三千大千世界持以
上佛佛卽受之龍女謂智積菩薩尊者舍利弗言我
獻寶珠世尊納受是事疾不荅言甚疾女言以汝神

觀我成佛復速於此當時衆會皆見龍女忽然之
間變成男子具菩薩行卽往南方無垢世界坐寶蓮
華成等正覺三十二相八十種好普爲十方一切衆
生演說妙法尔時娑婆世界菩薩聲聞天龍八部人
與非人皆遙見彼龍女成佛普爲時會人天說法心
大歡喜悉遙敬禮無量衆生聞法解悟得不退轉無
量衆生得受道記無垢世界六反震動娑婆世界三
千衆生住不退地三千衆生發菩提心而得受記智
積菩薩及舍利弗一切衆會默然信受

論曰經以象爲示者示言語莫能達其妙也然有
數種之象乃盡一義者有一種之象能該衆義者

問曰何謂數種之象乃盡一義乎曰如過去滅度之佛在寶塔中全身不散者以象自心之寂滅也如出大音聲讚歎言此塔爲聽法華經而至者以象寂滅非斷滅也如釋迦牟尼佛入多寶塔中與過去滅度之佛並座而坐者以象五蘊緣生之身具證寂滅靈知之體也又問曰何謂一種之象該衆義乎曰此經不因地位修證不因凡聖迷悟不論善趣惡趣男子女人之相不論新熏舊熏遲成速得之異則以娑竭羅龍王之女獻珠之頃而成正覺爲象也華嚴論曰如華嚴經說卽不然但使自無情見大智逾明萬法體真無轉變相如維摩

詰經曰舍利弗謂天女曰何故不轉女身天女謂舍利弗我從十二年來求女身相了不可得當何所轉菴提遮女謂舍利弗自男生我自女生當知萬法本自體如有何可轉如入法界品善財童子見善知識如文殊普賢比丘比丘尼居士長者童子優婆夷童女山人外道五十三人各各具菩薩行自具佛法隨諸衆生見身不同不言有轉若以法眼觀無俗不真若以世間眼觀無真不俗以法華經對權教三根見未盡者令成信種且將女相速轉成佛令生奇特方始發心趣真知見不堪本法而起善根此明且引三權令歸一實又破彼

時劫定執三僧祇今於刹那證三世性本來一際
無始無終稱法平等裂三乘之見網撤菩薩之草
菴令歸法界之門入佛真實之宅故令龍女成佛
明非過去久修年始八歲又表今非舊學轉女時
分不逾刹那具行佛果無虧毫髮法本如是自體
無時權學三根自將見隔迷自實法反以爲化不
知躬已本來如斯今處宅中猶存滯見云何界外
懸指僧祇此見不離定乖永劫回心見謝方始舊
居何如今時滅諸見業徒煩多劫苦困方回如華
嚴經法界緣起門明凡聖一真猶存見隔見存卽
凡情忘卽佛稱性緣起俯仰進退屈伸謙敬皆苦

薩行無有一法可轉變相有生住異滅故不同龍
女轉身成佛然華嚴論所示者法本然故而不
知法華龍女轉身成佛者象也便以象爲實法而優
劣之其可哉如善財童子登妙峯山頂不見德雲
比丘必於別峯乃見至彌勒樓閣之前閣門不開
必須彈指乃覺是二者亦皆象也又可以別峯乃
見彈指方覺而議之歟

無盡居士論曰佛於多劫嘗作國王爲求法故捨
捨國位奉事仙人經於千歲仙人爲說妙法華經
仙人者提婆達多是也由提婆達多善知識令我
具足六波羅蜜慈悲喜捨三十二相八十種好紫

摩金色十力四無所畏四攝法十八不共神通道
力成等正覺棄捨王位者示欲樂之無常也僕事
仙人者示善知識之難遇也仙人而能教佛者法
以口傳而佛以心證也故善財南詢善知識一一
經歷五十五位法門釋迦奉事善知識具足三十
七助道法其致一也佛道勤苦難成如此恐弟子
聞而退屈故又因智積問文殊以頗有衆生速成
佛不文殊爲說娑竭龍女年始八歲功德具足能
至菩提智積言如來於三千大千世界乃至無有
如芥子許非是捨身命處爲衆生故乃成菩提不
信此女於須臾頃乃得成佛舍利弗亦言女有五

障非是法器爾時龍女以無價寶珠上佛佛受之
卽變成男子於南方無垢世界成等正覺以此觀
之善受持法華經者忽然之間而非速也無量阿
僧祇劫而非遠也三乘非權也一乘非實也法法
融通則法音方便旋陀羅尼昭然現前矣

妙法蓮華經持品第十三

爾時藥王菩薩摩訶薩及大樂說菩薩摩訶薩與二
萬菩薩眷屬俱皆於佛前作是誓言惟願世尊不以
爲慮我等於佛滅後當奉持讀誦說此經典後惡世
衆生善根轉少多增上慢貪利供養增不善根遠離
解脫雖難可教化我等當起大忍力讀誦此經持說

書寫種種供養不惜身命。尔時象中五百阿羅漢受記者白佛言：世尊我等亦自誓願於異國土廣說此經。復有學無學八千人得受記者從座而起。合掌向佛作是誓言：世尊我等亦當於他國土廣說此經。所以者何？是娑婆國中人多弊惡，懷增上慢功德淺薄，瞋濁諂曲，心不實故。爾時佛姨母摩訶波闍波提比丘尼與學無學比丘尼六千人俱從座而起。一心合掌瞻仰尊顏，目不暫捨。於時世尊告憍曇彌：何故憂色而視？如來汝心將無謂我不說汝名授阿耨多羅三藐三菩提記耶？憍曇彌我先總說一切聲聞皆已授記。今汝欲知記者將來之世當於六萬八千億

諸佛法中爲大法師及六千學無學比丘尼俱爲法師。汝如是漸漸具菩薩道，當得作佛號一切衆生喜見。如來應供正徧知，明行足善逝世間解無上士調御丈夫。天人師佛世尊憍曇彌是一切衆生喜見佛及六千菩薩轉次授記得阿耨多羅三藐三菩提。爾時羅睺羅母耶輸陀羅比丘尼作是念：世尊於授記中獨不說我名。佛告耶輸陀羅：汝於來世百千萬億諸佛法中修菩薩行爲大法師，漸具佛道於善國中當得作佛號具足千萬光相。如來應供正徧知，明行足善逝世間解無上士調御丈夫。天人師佛世尊佛壽無量阿僧祇劫。爾時摩訶波闍波提比丘尼及耶

輸陀羅比丘尼并其眷屬皆大歡喜得未曾有卽於
佛前而說偈言

世尊導師 安隱天人 我等聞記 心安具足

諸比丘尼說是偈已白佛言世尊我等亦能於他方
國廣宣此經爾時世尊視八十萬億那由他諸菩薩
摩訶薩是諸菩薩皆是阿惟越致轉不退法輪得諸
陀羅尼卽從座起至於佛前一心合掌而作是念若
世尊告勅我等持說此經者當如佛教廣宣斯法復
作是念佛今默然不見告勅我當云何持諸菩薩敬
順佛意并欲自滿本願便於佛前作師子吼而發普
言世尊我等於如來滅後周旋往反十方世界能令

衆生書寫此經受持讀誦解說其義如法修行正憶
念皆是佛之威力惟願世尊在於他方遙見守護卽
時諸菩薩俱同發聲而說偈言

惟願不爲慮於佛滅度後恐怖惡世中我等當廣說
有諸無智人惡口罵詈等及加刀杖者我等皆當忍
惡世中比丘邪智心諂曲未得謂爲得我慢心充滿
或有阿練若納衣在空閑自謂行真道輕賤人間者
貪著利養故與白衣說法爲世所恭敬如六通羅漢
是人懷惡心常念世俗事假名阿練若好出我等過
而作如是言此諸比丘等爲貪利養故說外道論義
自作此經典誑惑世間人爲求名聞故分別於是經

常在大衆中欲毀我等故向國王大臣婆羅門居士
及餘比丘衆誹謗說我惡謂是邪見人說外道論義
我等敬佛故悉忍是諸惡爲斯所輕言汝等皆是佛
如此輕慢言皆當忍受之濁劫惡世中多有諸恐怖
惡鬼入其身罵詈毀辱我我等敬信佛當著忍辱鎧
爲說是經故忍此諸難事我不愛身命但惜無上道
我等於來世護持佛所囑世尊自當知濁世惡比丘
不知佛方便隨宜所說法惡口而顰蹙數數見擯出
遠離於塔寺如是等衆惡念佛告勅故皆當忍是事
諸聚落城邑其有求法者我皆到其所說佛所囑法
我是世尊使處衆無所畏我當善說法願佛安隱住

我於世尊前諸來十方佛發如是誓言佛自知我心
論曰學無學等八千人以娑婆國中入弊惡故欲
於他方國土廣說此經而波闍波提及耶輸陁羅
比丘尼亦欲於他方國土廣說此經佛則視八十
萬億那由他諸菩薩者鄙八千學無學及六千比
丘尼志願之不宏也而諸菩薩初猶冀佛明有告
勅而佛默然無說則知佛意所在譬如良馬而見
鞭影故經言時諸菩薩敬順佛意并欲自滿本願
便於佛前作師子吼而發誓言世尊我等於如來
滅後周旋往返十方世界今諸衆生書寫此經受
持讀誦解說其義如法修行正憶念皆是佛之威

力惟願世尊在於他方遙見守護則知佛之志願
此經不以濁惡憎嫉之世爲棄也至於同聲說偈
專以牢持忍力爲言譬如舟師不畏雲濤之險唯
恐櫓柂不固也金剛般若經曰若有善男子善女
人以恒河沙等身命布施若復有人於此經中乃
至受持四句偈等爲他人說其福甚多尔時須菩
提聞說是經深解義趣涕淚悲泣而白佛言希有
世尊佛說如是甚深經典我從昔來所得慧眼未
曾得聞如是之經釋之者曰爲離懈怠利養等樂
味故謂以布施如是身命之福猷莫及受持四句
偈之福則其可以一身味著懈怠故身爲障礙耶

四句偈者無我無人無衆生無壽者常修如是觀
則於濁惡憎嫉之世能弘此經須菩提所以聞之
而泣也起信論曰應忍他人惱心不懷報亦當忍
於諸善事心不懈退立志堅強遠離怯弱當念過
去久遠已來受一切身心大苦無有利益釋之者
曰爲於無數劫爲求世間貪欲境界遭斷身命畢
竟無有少分滋味爲對此緣當勤精進立志堅強
者能透情境故能觀諸體相故能不令緣差故能
成就世間出世間難事故常不忘此志則於濁惡
憎嫉之世能弘此經也然金剛般若經及起信論
所叙叙其不能忍苦以失大利策發其加精進而

已若智度論所叙則曰忍者是最善妙行若遇緣時當作是念我若以瞋報彼則爲自害又我先世自有是罪不得如意要必當償若於此人不受餘亦害我俱不得免云何起瞋又忍爲碑礫能瑩諸功德若人加惡如豬措金聚益發其明盖求佛道濟衆生之利器故曰忍爲最善妙行故西域有無價珠名曰玻黎若溺汙泥卽便涌出騰高一丈若置濁水則令濁水成塵唯在清水中卽便一住若置福多伽林中則異香噴發遮諸穢惡之氣令皆遠去菩薩忍力於弊惡之世如珠在福多伽林中發一切知見之香遮一切憎嫉之穢耳

無盡居士論曰佛旣以諸佛守護之法妙法蓮華經宣示四衆以無邊智慧自在神通觀見當來衆生善根尠薄信力狹劣謗毀者多受持者少乃說多寶如來久已滅度尚爲法來我於往昔爲求此法弃捨國王給事仙人吾今說法已竟汝等誰能護法當發大願於是藥王二萬菩薩及此會中授記者同聲發願願不爲慮我等於佛滅後當奉持讀誦廣說此經佛視八十萬億那由他諸菩薩是諸菩薩各作是念世尊默然不見告勅我當敬順佛意并欲自滿本願便於佛前作師子吼而發誓言我等於如來滅後周旋往返十方世界能令衆

生書寫此經受持讀誦解說其義如法修行夫空而無相寂而無體非信受則不能久非願力則不能持二萬菩薩與授記殷勤付囑各發大願則然已至於八十萬億那由他菩薩不待告勅而敬順佛意各發大願則佛與菩薩道存於顧視之間與同宣其義而說偈言遠矣

妙法蓮華經合論卷第四

音釋

播封藥切捷巨言切懾占入聲覆去聲使去聲寢處下上聲
俊且綠切礫陟格切洎他刀切

妙法蓮華經合論卷第五

經 姚秦三藏法師鳩摩羅什 譯

論 宋寶覺圓明禪師惠洪 造

附論 宋丞相無盡居士張商英 撰

妙法蓮華經安樂行品第十四

爾時文殊師利法王子菩薩摩訶薩白佛言世尊是諸菩薩甚為難有敬順佛故發大誓願於後惡世護持讀說是法華經世尊菩薩摩訶薩於後惡世云何能說是經佛告文殊師利若菩薩摩訶薩於後惡世欲說是經當安住四法一者安住菩薩行處親近處能為衆生演說是經文殊師利云何名菩薩摩訶薩

行處若菩薩摩訶薩住忍辱地柔和善順而不卒暴
心亦不驚又復於法無所行而觀諸法如實相亦不
行不分別是名菩薩摩訶薩行處云何名菩薩摩訶
薩親近處菩薩摩訶薩不親近國王王子大臣官長
不親近諸外道梵志尼犍子等及造世俗文筆讚詠
外書及路伽耶陀逆路伽耶陀者亦不親近諸有兇
戲相抄相撲及那羅等種種變現之戲又不親近旃
陀羅及畜豬羊雞狗咬獵漁捕諸惡律儀如是人等
或時來者則爲說法無所希望又不親近求聲聞比
丘比丘尼優婆塞優婆夷亦不問訊若於房中若經
行處若在講堂中不共住止或時來者隨宜說法無

所希求文殊師利又菩薩摩訶薩不應於女人身取
能生欲想相而爲說法亦不樂見若入他家不與小
女處女寡女等共語亦復不近五種不男之人以爲
親厚不獨入他家若有因緣須獨入時但一心念佛
若爲女人說法不露齒笑不現臂臆乃至爲法猶不
親厚况復餘事不樂畜年少弟子沙彌小兒亦不樂
與同師常好坐禪在於閑處修攝其心文殊師利是
名初親近處復次菩薩摩訶薩觀一切法空如實相
不顛倒不動不退不轉如虛空無所有性一切語言
道斷不生不出不起無名無相實無所有無量無邊
無礙無障但以因緣有從顛倒生故說常樂觀如是

法相是名菩薩摩訶薩第二親近處今時世尊欲重
宣此義而說偈言

若有菩薩於後惡世無怖畏心欲說是經應入行處
及親近處常離國王及國王子大臣官長兇險戲者
及旃陀羅外道梵志亦不親近增上慢人貪著小乘
三藏學者破戒比丘名字羅漢又比丘尼好戲笑者
深著五欲求現滅度諸優婆夷皆勿親近若是人等
以好心來到菩薩所爲聞佛道菩薩則以無所畏心
不懷希望而爲說法寡女處女及諸不男皆勿親近
以爲親厚亦莫親近屠兒魁膾吸獵漁捕爲利殺害
販肉自活街賣女色如是之人皆勿親近兇險相撲

種種嬉戲諸婬女等盡勿親近莫獨屏處爲女說法
若說法時無得戲笑入里乞食將一比丘若無比丘
一心念佛是則名爲行處近處以此二處能安樂說
又復不行上中下法有爲無爲實不實法亦不分別
是男是女不得諸法不知不見是則名爲菩薩行處
一切諸法空無所有無有常住亦無起滅是名智者
所親近處處顛倒分別諸法有無是實非實是生非生
在於閑處修攝其心安住不動如須彌山觀一切法
皆無所有猶如虛空無有堅固不生不出不動不退
常住一相是名近處若有比丘於我滅後入是行處
及親近處說斯經時無有怯弱菩薩有時入於靜處

以正憶念隨義觀法從禪定起爲諸國王王子臣民
婆羅門等開化演暢說斯經典其心安隱無有怯弱
文殊師利是名菩薩安住初法能於後世說法華經
論曰如前文稱當入如來室著如來衣坐如來座
乃說此經者蓋其親近隨順之至者也自凡大衆
生之地而能具大慈悲柔和忍辱了諸法空非其
親近隨順之至而佛攝受護念之深何以臻此哉
今此但言於後惡世欲說是經當安住四法一者
住忍辱地觀諸法空如實相二者安施床座著新
淨衣三者起大慈父想四者生大悲心者方將親
近隨順而經營之際者何以明之曰前言乃說

此經今言欲說此經故前言著如來衣坐如來座
此言而施床座著新淨衣故前言入如來室此言
起大慈父想生大悲心而已故以是知其不同也
首楞嚴經曰猶如旅泊之人忽蒙天王賜與華屋
雖獲大宅要因門入則最初息惑之要無如止觀
自止觀乃證定慧也自定慧乃能同塵也自同塵
乃能會悲也何謂止觀曰經言住忍辱地唯忍辱
力爲能消散違害之緣所言心不卒暴亦不驚者
不動如山止也於法無所行而觀諸法如實相者
空也空則離分別相乃曰亦不行不分別者假也
觀空而不礙假中也空中假者觀法也入法界品

善財童子登妙峯山於其山上東西南北四維
下觀察求覓渴仰欲見德雲比丘經于七日見彼
比丘在別山上徐步經行釋之者曰妙峯山卽止
之象十方觀察卽觀之象偏住於止防其沉偏在
于觀防其亂言七日者以七覺支推求升進除其
沉掉故言徐步則不拘亂體言經行則不住淨心
定亂兩融方能契會當如德雲比丘則是行處也
何謂定慧曰經言國王王子大臣官長者驕氣矜
色之會希求諂曲之域也言外道梵志尼犍子等
者梵志出家而邪見尼犍子在家而邪見者也言
世俗文筆讚誄外書者綺靡不根之語異端雜擻

之學也言路伽耶隨者師破弟子之論逆路伽耶
隨者弟子破師之論者也言兇戲相杓相撲及那
羅等種種變現之戲者散亂顛倒之習塵勞耳目
之觀也那羅此言力旃隨羅此言嚴幟謂以業自
嚴行持標幟之者也言女人身及小女處女寡女
乃至五種不男之人年少弟子沙彌小兒者趣惡
道之捷徑焚草根之烈燄是皆惡世障道之緣雜
染之相也弘經菩薩一切不當親近所當親近者
定慧而已故經言常好坐禪在於閒處修攝其心
善財童子至摩利聚落周遍求覓海幢比丘乃見
其在經行地側結加趺坐入于三昧離出入息

別思覺者釋之者曰以明寂用自在也言經行時
則用言三昧則寂依用有寂也而言側者不住寂
用之中而任運自在故離出入息則稱理而寂稱
理而用性自徧周非同二乘作寂滅之證也當如
海幢比丘則是初親近處也經言觀一切法如實
相者明見自信無有錯謬以有分別則顛倒以有
所疑則有動以有所畏則有退以有所惑則有轉
而虛空無所有性之中尚無有滅豈有生尚無有
沒豈有出尚無有止豈有起以是知因緣顛倒故
不能如實而知然入此觀法要必勇猛精進志力
堅固者故經於偈內深致其意曰於後惡世無怖

畏心又曰菩薩則以無所畏心又曰說斯經時無
有怯弱又曰其心安隱無有怯弱善財童子至海
岸聚落觀察十方求覓善住比丘見此比丘於虛
空中來往經行者釋之者曰以法空觀察三界細
習淨業現前故證得十無障礙法門惟無障礙故
於虛空中來往經行也當如善住比丘則是第二
親近處也

又文殊師利如來滅後於末法中欲說是經應住安
樂行若口宣說若讀經時不樂說人及經典過亦不
輕慢諸餘法師不說他人好惡長短於聲聞人亦不
稱名說其過惡亦不稱名讚歎其美又亦不生怨嫌

之心善修如是安樂心故諸有聽者不逆其意有所
難問不以小乘法荅但以大乘而爲解說令得一切
種智尔時世尊欲重宣此義而說偈言

菩薩常樂安隱說法於清淨地而施床座以油塗身
澡浴塵穢著新淨衣內外俱淨安處法座隨問爲說
若有比丘及比丘尼諸優婆塞及優婆夷國王王子
群臣士民以微妙義和顏爲說若有難問隨義而荅
因緣譬喻敷演分別以是方便皆使發心漸漸增益
入於佛道除懶惰意及懈怠思想離諸憂惱慈心說法
晝夜常說無上道教以諸因緣無量譬喻開示衆生
咸令歡喜衣服卧具飲食醫藥而於其中無所希望

但一心念說法因緣願成佛道今衆亦尔是則大利
安樂供養我滅度後若有比丘能演說斯妙法華經
心無嫉恚諸惱障礙亦無憂愁及罵詈者又無怖畏
加刀杖等亦無擯出安住忍故智者如是善修其心
能住安樂如我上說其人功德千萬億劫筭數譬喻
說不能盡

論曰何謂同塵曰經言若口宣說若讀經時不樂
說人及經典過者忘其言也又言亦不輕慢諸餘
法師者忘其我也又言不說他人好惡長短乃至
亦不稱名讚歎其美者忘其緣也又言又亦不生
怨嫌之心者忘其心也夫忘言至於忘我忘我至

於忘緣忘緣至於忘心則闕世類然而已故言善
修如是安樂心然不逆其意者隨緣而起也必峇
以大乘者隨扣而應也唯忍辱力堅固法空之觀
深諦乃能如是故偈曰菩薩常樂安隱說法於清
淨地而施床座以油塗身澡浴塵穢著新淨衣內
外俱淨善財童子至三眼園於城邑聚落村鄰市
肆川原山谷一切處周遍求覓善見比丘見在林
中經行往返壯年美貌端正可喜釋之者曰一切
處周遍求覓者同塵也壯年美貌者同塵之相也
唯其心離世間方堪處俗和光利物耳言見在林
中經行者雖示同塵之行亦不滯此淨行之中當

如善見比丘則是成就第三法行也

又文殊師利菩薩摩訶薩於後惡世法欲滅時受持
讀誦斯經典者無懷嫉妬諂誑之心亦勿輕罵學佛
道者求其長短若比丘比丘尼優婆塞優婆夷求聲
聞者求辟支佛者求菩薩道者無得惱之令其疑悔
語其人言汝等去道甚遠終不能得一切種智所以
者何汝是放逸之人於道懈怠故又亦不應戲論諸
法有所諍競當於一切衆生起大悲想於諸如來起
慈父想於諸菩薩起大師想於十方諸大菩薩常應
深心恭敬禮拜於一切衆生平等說法以順法故不
多不少乃至深愛法者亦不爲多說文殊師利是善

法華論卷五
薩摩訶薩於後末世法欲滅時有成就第三安樂
行者說是法時無能惱亂得好同學共讀誦是經亦
得大衆而來聽受聽已能持持已能誦誦已能說說
已能書若使人書供養經卷恭敬尊重讚歎爾時世
尊欲重宣此義而說偈言

若欲說是經當捨嫉恚慢諂誑邪僞心常修質直行
不輕憊於人亦不戲論法不令他疑悔云汝不得佛
是佛子說法常柔和能忍慈悲於一切不生懈怠心
十方大菩薩愍衆故行道應生恭敬心是則我大師
於諸佛世尊生無上父想破於憍慢心說法無障礙
第三法如是智者應守護一心安樂行無量衆所敬

又文殊師利菩薩摩訶薩於後末世法欲滅時有持
是法華經者於在家出家人中生大慈心於非菩薩
人中生大悲心應作是念如是之人則爲大失如來
方便隨宜說法不聞不知不覺不問不信不解其人
雖不問不信不解是經我得阿耨多羅三藐三菩提
時隨在何地以神通力智慧力引之令得住是法中
文殊師利是菩薩摩訶薩於如來滅後有成就此第
四法者說是法時無有過失

論曰何謂會悲曰經言當於一切衆生起大悲想
者則豈復暴其所未至也言於諸如來起慈父想
者豈敢失其所不忘念也言於諸菩薩起大師想

乃至恭敬禮拜者豈當負其法道之恩也言於諸
衆生平等說法乃至深愛法者亦不爲多說者豈
有背其隨順之行也未發菩提心者悲愍之已登
無上道者依歸之同行菩薩道者愛敬之及其以
法施諸衆生亦不違隨順之旨惡世弘經菩薩如
是用心是謂第三安樂行於惡世不忘柔和忍辱
猛利精勤者以智故偈言是佛子說法常柔和能
忍慈悲於一切不生懈怠心也問曰如前所示皆
菩薩於惡世以智故安樂行未聞會悲之旨也曰
經言於在家出家人中者謂已發菩提心而未知
此經則生大慈心爲演說之而與之樂於非菩薩

人中者謂未發菩提心又亦未知此經則生大悲
心爲演說之而拔其苦至於其人不知不信不解
則以神通力智慧力引之令住是法中此其以智
與悲會明矣善財童子至海潮處入普莊嚴國周
遍觀察見休捨優婆夷坐於妙座而告善財曰東
方諸佛常來至此處於寶座上爲我說法南西北
方四維上下一切諸佛悉來至此處於寶座爲我
說法善男子我常不離見佛聞法與諸菩薩而共
同住釋之者曰十方諸佛悉來至我所坐寶座上
爲我說法者悲與智會之象休捨優婆夷悲也十
方諸佛智也當如休捨優婆夷則是成就此第四

法行也

常爲比丘比丘尼優婆塞優婆夷國王王子大臣人民婆羅門居士等供養恭敬尊重讚歎虛空諸天爲聽法故亦常隨侍若在聚落城邑空閑林中有人來欲難問者諸天晝夜常爲法故而衛護之能令聽者皆得歡喜所以者何此經是一切過去未來現在諸佛神力所護故文殊師利是法華經於無量國中乃至名字不可得聞何況得見受持讀誦文殊師利譬如強力轉輪聖王欲以威勢降伏諸國而諸小王不順其命時轉輪王起種種兵而往討伐王見兵衆戰有功者卽大歡喜隨功賞賜或與田宅聚落城邑或

與衣服嚴身之具或與種種珍寶金銀琉璃磚磑瑪瑙珊瑚琥珀象馬車乘奴婢人民唯髻中明珠不以與之所以者何獨王頂上有此一珠若以與之王諸眷屬必大驚恠文殊師利如來亦復如是以禪定智慧力得法國土王於三界而諸魔王不肯順伏如來賢聖諸將與之共戰其有功者心亦歡喜於四衆中爲說諸經令其心悅賜以禪定解脫無漏根力諸法之財又復賜與涅槃之城言得滅度引導其心令皆歡喜而不爲說是法華經文殊師利如轉輪王見諸兵衆有大功者心甚歡喜以此難信之珠久在髻中不妄與人而今與之如來亦復如是於三界中爲

法王以法教化一切衆生見賢聖軍與五陰魔煩惱
魔死魔共戰有大功勳滅三毒出三界破魔網余時
如來亦大歡喜此法華經能令衆生至一切智一切
世間多怨難信先所未說而今說之文殊師利此法
華經是諸如來第一之說於諸說中最爲甚深末後
賜與如彼強力之王久護明珠今乃與之文殊師利
此法華經諸佛如來秘密之藏於諸經中最在其上
長夜守護不妄宣說始於今日乃與汝等而敷演之
余時世尊欲重宣此義而說偈言

常行忍辱哀愍一切乃能演說佛所讚經後末世時
持此經者於家出家及非菩薩應生慈悲斯等不聞
不信是經則爲大失我得佛道以諸方便爲說此法
令住其中譬如強力轉輪之王兵戰有功賞賜諸物
象馬車乘嚴身之具及諸田宅聚落城邑或與衣服
種種珍寶奴婢財物歡喜賜與如有勇健能爲難事
王解髻中明珠賜之如來亦爾爲諸法王忍辱大力
智慧寶藏以大慈悲如法化世見一切人受諸苦惱
欲求解脫與諸魔戰爲是衆生說種種法以大方便
說此諸經既知衆生得其力已末後乃爲說是法華
如王解髻明珠與之此經爲尊衆經中上我常守護
不妄開示今正是時爲汝等說我滅度後求佛道者
欲得安隱演說斯經應當親近如是四法讀是經者

常無憂惱又無病痛顏色鮮白不生貧窮卑賤醜陋
衆生樂見如慕賢聖天諸童子以爲給使刀杖不加
毒不能害若人惡罵口則閉塞遊行無畏如師子王
智慧光明如日之照若於夢中但見妙事見諸如來
坐師子座諸比丘衆圍繞說法又見龍神阿脩羅等
數如恒沙恭敬合掌自見其身高爲說法又見諸佛
身相金色放無量光照於一切以梵音聲演說諸法
佛爲四衆說無上法見身處中含掌讚佛聞法歡喜
而爲供養得陀羅尼證不退智佛知其心深入佛道
卽爲授記成最正覺汝善男子當於來世得無量智
佛之大道國土嚴淨廣大無比亦有四衆合掌聽法

又見自身在山林中修習善法證諸實相深入禪定
見十方佛

諸佛身金色百福相莊嚴聞法爲人說常有是好夢
又夢作國王捨宮殿眷屬及上妙五欲行詣於道場
在菩提樹下而處師子座求道過七日得諸佛之智
成無上道已起而轉法輪爲四衆說法經千萬億劫
說無漏妙法度無量衆生後當入涅槃如烟盡燈滅
若後惡世中說是第一法是人得大利如上諸功德
論曰佛初自鹿野苑至耆闍崛山次第演說隨其
機宜衆生之機未熟則不宜說大乘如其已熟則
不宜說小法始說小乘小乘者純有也以諸凡夫

繫著世法以爲實有隨於色塵作諸不善以不善
故墮於苦趣還將有法轡勒其心於是以戒防護
其諸不善之法故次說般若般若者破有明空也
謂小乘實有今成軌範制其身語意業令住善法
既說生空等觀方說法空之理破彼繫著漸向法
身故次說解深密經解深密者和會空有今邊見
者不滯二門則爲不空不有以二乘則滅識證寂
住寂無知欲回此機故安立九識爲純淨識五六
七八等識常以九識爲依凡愚不了妄執爲我如
水瀑流不離水體既回此機則令達識成智以二
乘於生死業種六七八識有怖畏故恐其難信以

方便故於生死外別立純淨識名漸引令留惑不
滅則庶其悲智漸生解深密經曰如是菩薩雖由
法住以智爲依止漸令空見達識成智故次說楞
伽經楞伽經者以直爲大乘根堪之者頓說第八
業種之識名爲如來藏識也曰得相者曰識不得
相曰智又曰藏識海常住境界風所動蓋此經直
於無明業種以明智門明與無明其性不二然說
無明業種成智猶希出俗未現同塵故次說維摩
詰經維摩詰經者不以聲聞二乘及三乘菩薩爲
知法者也故以十大弟子彌勒光嚴菩薩皆不敢
嬰其辭而以文殊師利爲法身以維摩詰爲入塵

之行蓋法身為體而行爲用體用自相問答爲三
乘樂學如如空理厭假修真積行多生方成佛者
令歸法界性相事理因果同時故次乃說此法華
經故言如彼強力之王久護明珠今乃與之也
無盡居士張商英論曰文殊師利見諸菩薩敬順
佛意發大誓願疑後惡世難說是經佛言欲說是
經當安住四法四法者安樂行也第一行者勿行
於不可行勿近於不可近第二行者勿談於長短
勿生於慈嫌第三行者勿懷諂嫉亦勿戲慢第四
行者於在家出家人中生大慈心於非菩薩人中
生大悲心住此四行人安之已亦樂之已樂之人

亦安之如此而後經可廣宣云可久持也若不具
此安樂四行雖使聲聞如稻麻竹葦辟支佛如恒
河沙亦不能使其信受也故誓願者所以持經安
樂行者所以持願二者相須不可偏廢

妙法蓮華經從地涌出品第十五

爾時他方國土諸來善薩摩訶薩過八恒河沙數於
大衆中起合掌作禮而白佛言世尊若聽我等於佛
滅後在此娑婆世界勤加精進護持讀誦書寫供養
是經典者當於此土而廣說之爾時佛告諸菩薩摩
訶薩衆止善男子不須汝等護持此經所以者何我
娑婆世界自有六萬恒河沙等菩薩摩訶薩一一菩

薩各有六萬恒河沙眷屬是諸人等能於我滅後護
持讀誦廣說此經

論曰佛於一切菩薩聲聞天龍之衆有所問難不
逆其意今他方國土諸來菩薩白言聽我等於佛
滅後於此娑婆世界弘經而佛曰不須汝等護持
此經佛何獨逆其意耶曰此品佛示依法力自然
修行爲貴而鄙未覺幻力而修者也何以知之圓
覺經有三種觀法一曰寂靜二曰如幻三曰寂滅
佛爲辯音菩薩說則曰若諸菩薩唯取極靜以靜
力故乃至若諸菩薩唯觀如幻以佛力故乃至若
諸菩薩唯滅諸幻不取作用如是三種謂之依

未覺幻力修習而已至爲威德自在菩薩說則曰
若諸菩薩悟淨圓覺以淨覺心取靜爲行乃至若
諸菩薩悟淨圓覺以淨覺心知覺心性乃至若諸
菩薩悟淨圓覺以淨覺心不取幻化及諸靜相而
此三種先必言悟淨圓覺而後乃起行進修謂之
親近隨順也三乘淨土菩薩則依於信力而修故
不言悟淨圓覺地上法身菩薩則依於法力而修
故圓覺經曰皆是圓覺親近隨順非特圓覺經爲
然起信論亦曰體用熏習分別復有二種云何爲
二一者未相應謂凡夫二乘初發意菩薩以意識
熏習依信力故而能修行未得無分別心與體相

應故未得自在業修行與用相應故二者已相應
謂法身菩薩得無分別心與諸佛智用相應唯依
法力自然修行熏習真如滅無明故經言佛告諸
菩薩摩訶薩衆止善男子不須汝等護持此經者
以法華非依未覺幻力而修者也故稱他方國土
諸來菩薩又言我娑婆世界自有六萬恒河沙等
乃至廣說此經者以法華唯依法力自然修行自
然修行猶言隨順之也舊疏曰如來止之者有三
義汝等各各有已任若許汝住此土則廢彼土
利益又他方此土結緣事淺雖欲宣授必無大益
又若許之則不得名下方諸菩薩矣下方諸菩薩

若不來跡不得破是謂三義陋哉之論也

佛說是時娑婆世界三千大千國土地皆振裂而於
其中有無量千萬億菩薩摩訶薩同時涌出是諸菩
薩身皆金色三十二相無量光明先盡在此娑婆世
界之下此界虛空中住是諸菩薩聞釋迦牟尼佛所
說音聲從下發來

論曰如前文言分身諸佛在於十方者一切智智
清淨無二無二分無別無斷故之象也此言三千
大千國土地皆振裂而於其中有無量千萬億菩
薩摩訶薩同時涌出者如來大智慧無量神通光
明皆出於止觀地中之象也故言是諸菩薩身皆

金色三十二相無量光明既言在此娑婆世界之下又言此界虛空中住則究竟無所住矣言聞釋迦牟尼佛所說音聲從下發來則究竟無所來矣住不見其處來不知所從但見從地涌出則無量智慧神通光明不可知其所從來所可知者出於止觀法而已華嚴論曰當以止觀力功熟乃證急亦不成緩亦不得但知不休必不虛弃如乳有酪皆須待緣緣之中無作者故其酪成已亦無來處亦非本有如來智慧以戒定慧衆善方便以照之而緣緣之中無作者無成就故然於一切智一切種智於中而得朗然於諸法中無能作所作故亦

非本有亦非本無以第一義中無本無末無始無終無成無壞無三世古今不可作本有及以修生成就世間斷常諸見及諸諍論應如是知此經之設象而華嚴論辭釋之皎如日星而舊疏曰在下不屬彼非此非彼卽中道也錯謬甚矣

一一菩薩皆是大衆唱導之首各將六萬恒河沙眷屬况將五萬四萬三萬二萬一萬恒河沙等眷屬者况復乃至一恒河沙半恒河沙四分之一乃至千萬億那由他分之一况復千萬億那由他眷屬况復億萬眷屬况復千萬百萬乃至一萬况復一千一百乃至一十况復將五四三二一弟子者况復算已樂

離行如是等比無量無邊筭數譬喻前所不能知是
菩薩從地出已各詣虛空七寶妙塔多寶如來釋迦
牟尼佛所到已向二世尊頭面禮足及至諸寶樹
師子座上佛所亦皆作禮右繞三匝合掌恭敬以讚
菩薩種種讚法而以讚歎住在一面欣樂瞻仰於
世尊

論曰如經之文所叙則六萬五萬四萬三萬二萬
一萬恒河沙等眷屬爲多也而叙五四三二一第
子至於單已爲少也推經之辭乃曰况將况復則
是五四三二一弟子至於單已爲多也多少之數
綿密而言數之意無所系屬可疑也及觀結其辭

則曰如是等比無量無邊筭數譬喻所不能知然
後知其所示非數也直以明如來大智慧功德光
明非思議分別所能及也夫以如來大智慧神通
光明出於止觀地中則已知其旨矣其言是諸菩
薩從地出已各詣虛空七寶妙塔多寶如來釋迦
牟尼佛所何意哉曰多寶過去滅度之佛寂滅體
之象也釋迦現在發生之佛五蘊身之象於五蘊
現行之中證一切如來智慧神通光明則諸菩薩
所以俱至其所也故言諸菩薩種種讚法而以讚
歎住在一面欣樂瞻仰於二世尊也問曰現行五
蘊之身乃能證如來智慧功德光明乎曰一切神

龍具有三毒亦發神通况自心達理不與妄合其
智自神者乎首楞嚴經論禁戒成就則曰是清淨
人修三摩地父母肉身不須天眼自然觀見十方
睹佛聞法親奉聖旨得大神通游十方界維摩詰
經曰亦不滅受而取證父母所生之眼不須天眼
則色蘊也亦不滅受則受蘊也自色受以觀想行
識莫不皆然何疑其不能證乎

是諸菩薩摩訶薩從初涌出以諸菩薩種種讚法而
讚於佛如是時間經五十小劫是時釋迦牟尼佛默
然而坐及諸四衆亦皆默然五十小劫佛神力故令
諸大衆謂如半日尔時四衆亦以佛神力故見諸菩

薩徧滿無量百千萬億國土虛空是菩薩衆中有四
導師一名上行二名無邊行三名淨行四名安立行
是四菩薩於其衆中取爲上首唱導之師在大衆前
各共合掌觀釋迦牟尼佛而問訊言世尊少病少惱
安樂行不應度者受教易不令世尊生疲勞耶
尔時四大菩薩而說偈言

世尊安樂少病少惱教化衆生得無疲倦又諸衆生
受化易不令世尊生疲勞耶

爾時世尊於菩薩大衆中而作是言如是如是諸善
男子如來安樂少病少惱諸衆生等易可化度無有
疲勞所以者何是諸衆生世世已來常受我化亦

過去諸佛恭敬尊重種諸善根此諸衆生始見我身
聞我所說卽皆信受入如來慧除先修習學小乘者
如是之人我今亦令得聞是經入於佛慧爾時諸大
菩薩而說偈言

善哉善哉大雄世尊諸衆生等易可化度能問諸佛
甚深智慧聞已信行我等隨喜

於時世尊讚歎上首諸大菩薩善哉善哉善男子汝
等能於如來發隨喜心

論曰華嚴論曰如權教中佛生之後卽以踰城出
家菩提樹下成等正覺時以之爲時如毗盧遮那
佛卽實不如是如來安立化相爲度三乘衆生應

見如是出家成佛蓋毗盧遮那佛依本法界成大
菩提還依本法界無始無終不出不沒無成無壞
無有時分以是觀之則佛從兜率天下降神入母
胎轉法輪入涅槃無不出一剎那際彼天猶未下
母胎猶未出此已入涅槃一切法事終畢矣經言
如是時間經五十小劫是時釋迦牟尼佛默然而
坐及諸四衆亦皆默然五十小劫佛神力故今諸
大衆謂如半日非特佛降神入胎般涅槃不出一
剎那際觀於無量劫亦不出一剎那際以是知五
十小劫者佛爲衆生故安立化相也問曰何以證
知耶曰經言是菩薩衆中有四導師一名上行者

卽前所謂依法力隨順修行者也此行爲萬行之最故以象之二名無邊行者卽前所謂如來大智慧神通光明者也此行無量無邊故以象之三名淨行者卽以無量無邊如來智慧神通光明嚴淨法身者也如前諸菩薩從地涌出向二世尊所以象之四名安立行者卽以方便隨其機宜安立五十小劫謂如半日者也以一剎那際無長短時分故以象之耳

爾時彌勒菩薩及八千恒河沙諸菩薩衆皆作是念我等從昔已來不見不聞如是大菩薩摩訶薩衆從地涌出住世尊前合掌供養問訊如來時彌勒菩薩

摩訶薩知八千恒河沙諸菩薩等心之所念，欲自決所疑，合掌向佛以偈問曰：

無量千萬億大衆諸菩薩，昔所未曾見，願兩足尊說。是從何所來，以何因緣集，巨身大神通，智慧叵思議。其志念堅固，有大忍辱力，衆生所樂見，爲從何所來。一一諸菩薩，所將諸眷屬，其數無有量，如恒河沙等。或有大菩薩，將六萬恒河沙，如是諸大衆，一心求佛道。是諸大師等，六萬恒河沙，俱來供養佛，及護持是經。將五萬恒河沙，其數過於四萬，及三萬二萬至一萬一千一百等，乃至一恒沙，半及三四分億萬分之一。千萬那由他，萬億諸弟子，乃至於半億，其數復過上。

百萬至一萬一千及一百五十與一十乃至三二一
單已無眷屬樂於獨處者俱來至佛所其數轉過上
如是諸大衆若人行籌數過於恒沙劫猶不能盡知
是諸大威德精進菩薩衆誰爲其說法教化而成就
從誰初發心稱揚何佛法受持行誰經修習何佛道
如是諸菩薩神通大智力四方地振裂皆從中涌出
世尊我昔來未曾見是事願說其所從國土之名號
我常游諸國未曾見是衆我於此衆中乃不識一人
忽然從地出願說其因緣今此之大會無量百千億
是諸菩薩等皆欲知此事是諸菩薩衆本末之因緣
無量德世尊惟願決衆疑

爾時釋迦牟尼分身諸佛從無量千萬億他方國土
來者在於八方諸寶樹下師子座上結加趺坐其佛
侍者各各見是菩薩大衆於三千大千世界四方從
地涌出住於虛空各白其佛言世尊此諸無量無邊
阿僧祇菩薩大衆從何所來爾時諸佛各告侍者諸
善男子且待須臾有菩薩摩訶薩名曰彌勒釋迦牟
尼佛之所授記次後作佛已問斯事佛今答之汝等
自當因是得聞今時釋迦牟尼佛告彌勒菩薩善哉
善哉阿逸多乃能問佛如是大事汝等當共一心被
精進鎧發堅固意如來今欲顯發宣示諸佛智慧諸
佛自在神通之力諸佛師子奮迅之力諸佛威猛大

勢之力爾時世尊欲重宣此義而說偈言
當精進一心我欲說此事勿得有疑悔佛智叵思議
汝今出信力住於忍善中昔所未聞法今皆當得聞
我今安慰汝勿得懷疑懼佛無不實語智慧不可量
所得第一法甚深叵分別如是今當說汝等一心聽
爾時世尊說此偈已告彌勒菩薩我今於此大眾宣
告汝等阿逸多是諸大菩薩摩訶薩無量無數阿僧
祇從地涌出汝等昔所未見者我於是娑婆世界得
阿耨多羅三藐三菩提已教化示導是諸菩薩調伏
其心今發道意此諸菩薩皆於是娑婆世界之卜此
界虛空中住於諸經典讀誦通利思惟分別正憶念

阿逸多是諸善男子等不樂在衆多有所說常樂靜
處勤行精進未曾休息亦不依止人天而住常樂深
智無有障礙亦常樂於諸佛之法一心精進求無上
慧尔時世尊欲重宣此義而說偈言

阿逸汝當知是諸大菩薩從無數劫來修習佛智慧
悉是我所化令發大道心此等是我子依止是世界
常行頭陀事志樂於靜處捨大眾憤鬧不樂多所說
如是諸子等學習我道法晝夜常精進爲求佛道故
在娑婆世界下方空中住志念力堅固常勤求智慧
說種種妙法其心無所畏我於伽耶城菩提樹下坐
得成最正覺轉無上法輪爾乃教化之令初發道心

今皆住不退悉當得成佛我今說實語汝等一心信我從久遠來教化是等衆

論曰彌勒所問之偈其略曰如是諸菩薩神通大智力四方地震裂皆從中涌出世尊我昔來未曾見是事願說其所從國土之名號我常游諸國未曾見是衆我於此衆中乃不識一人忽然從地出願說其因緣者彌勒辭似疑而意則悟矣及佛荅其問則曰汝等當共一心被精進鎧發堅固意如來今欲顯發宣示諸佛智慧諸佛自在神通之力則遂明告而直指之也而前論所叙從地涌出無量千萬億菩薩摩訶薩爲如來大智慧神通光明

之象斷以佛之明告直指則可無疑矣問曰經言諸佛師子奮迅之力諸佛威猛大勢之力何謂也曰師子之奮迅離疲懈相故師子之威猛示無畏相故而必言諸佛者以其大慈爲此之相以激諸菩薩勤求佛道也諸佛何嘗有疲懈怯弱哉示現之則然也故其教菩薩則被精進鎧發堅固意而其自爲則謂之奮迅謂之威猛也問曰從地涌出無量千萬億菩薩摩訶薩爲如來大智慧神通光明之象則證義甚明然何以決知其必出於止觀二法乎曰以佛荅彌勒之問知之但其辭微密故學者莫能曉也如言是諸菩薩調伏其心令發道

意者一切菩薩皆以止觀之法調伏自心息滅惑障令趨無上菩提也故其偈曰初令發道心今皆住不退此但略示其綱目耳至於詳言之則曰是善男子不樂在衆多有所說常樂靜處勤行精進未曾休息者止也又曰亦不依止人天而住常樂深智無有障礙亦常樂於諸佛之法一心精進求無上慧者觀也止法貴不懈故稱勤行精進觀法貴專主故稱一心精進故論敢顯言出於止觀地中者以明見佛意無有錯謬故

爾時彌勒菩薩摩訶薩及無數諸菩薩等心生疑惑怪未曾有而作是念云何世尊於少時間教化如是

無量無邊阿僧祇諸大菩薩令住阿耨多羅三藐三菩提卽白佛言世尊如來爲太子時出於釋宮去伽耶城不遠坐於道場得成阿耨多羅三藐三菩提從是已來始過四十餘年世尊云何於此少時大作佛事以佛勢力以佛功德教化如是無量大菩薩衆當成阿耨多羅三藐三菩提世尊此大菩薩衆假使人於千萬億劫數不能盡不得其邊斯等久遠已來於無量無邊諸佛所植諸善根成就菩薩道常修梵行世尊如此之事世所難信譬如有人色美髮黑年二十五指百歲人言是我子其百歲人亦指年少言是我父生育我等是事難信佛亦如是得道以來其

實未久而此大衆諸菩薩等已於無量千萬億劫爲
佛道故勤行精進善入出住無量百千萬億三昧得
大神通久修梵行善能次第習諸善法巧於問答人
中之寶一切世間甚爲希有今日世尊方云得佛道
時初令發心教化示導令向阿耨多羅三藐三菩提
世尊得佛未久乃能作此大功德事我等雖復信佛
隨宜所說佛所出言未曾虛妄佛所知者皆悉通達
然諸新發意菩薩於佛滅後若聞是語或不信受而
起破法罪業因緣唯然世尊願爲解說除我等疑及
未來世諸善男子聞此事已亦不生疑爾時彌勒菩
薩欲重宣此義而說偈言

佛昔從釋種出家近伽耶坐於菩提樹衆來尚未久
此諸佛子等其數不可量久已行佛道住於神通力
善學菩薩道不染世間法如蓮華在水從地而湧出
皆起恭敬心住於世尊前是事難思議云何而可信
佛得道甚近所成就甚多願爲除衆疑如實分別說
譬如少壯人年始二十五示人百歲子髮白而面皺
是等我所生子亦說是父父少而子老舉世所不信
世尊亦如是得道來甚近是諸菩薩等志固無怯弱
從無量劫來而行菩薩道巧於難問答其心無所畏
忍辱心決定端正有威德十方佛所讚善能分別說
不樂在人衆常好在禪定爲求佛道故於下空中住

我寺從佛聞於此事無疑願佛爲未來演說令開解
若有於此經生疑不信者卽當墮惡道願今爲解說
是無量菩薩云何於少時教化令發心而住不退地
論曰此段經文致深妙之意而古今文字之師莫
能知之所能知者知其粗耳如准比諸師雖粗亦
不知以譬釋譬曰父服還年之藥故貌同二十五
歲人而子不服此藥故形如百歲也若知是藥之
力則不疑父少而子老今爭怪之者不知故如來
橫服垂迹之藥示伽耶城之始生而諸菩薩則直
論本起因地久發道心令住不退耳問曰旣排斥
此義則所謂深妙者可得聞乎曰佛以止觀方便

成就如來大智慧神通光明無量無邊皆已現前
矣而憂聲聞辟支佛地前菩薩不解故謂如來大
智慧神通光明始假止觀二法而發現未見此大
智慧神通光明如來本來自具之意故經下文言
如是我成佛已來甚大久遠壽命無量阿僧祇劫
常住不滅夫言無量阿僧祇劫常住不滅則所謂
大智慧神通光明非始假止觀二法而發現也如
圓覺經佛爲文殊師利菩薩說無明體性曰善男
子此無明者非實有體如夢中人夢時非無及至
於醒了無所得者示無明體性究竟滅也復憂其
住心於滅則隨又曰如衆空華滅於空時不可說

言有定滅處何以故無生處故一切衆生於無生
中妄見生滅是故說名輪轉生死佛於圓覺談無
明體性尚不許存生滅之見豈於法華談大智慧
神通光明而容作修生本有之解乎

無盡居士論曰他方國土諸來菩薩過八恒河沙
數白佛言願聽我等於娑婆世界護持此經佛言
我此世界自有六萬恒河沙數菩薩一一菩薩各
有六萬恒河沙眷屬是等能於我滅後廣說此經
時娑婆世界三千大千國土地皆震裂而於其中
菩薩涌出各詣虛空寶塔禮多寶釋迦二佛各以
種種讚偈而讚於佛如是時間經五十小劫佛神

力故謂如半日有四導師而爲上首曰上行曰無
邊行曰淨行曰安立行皆於如來發隨喜心彌勒
菩薩及八千恒河沙諸菩薩衆問此地涌出本末
因緣佛言我於此娑婆世界成佛已教化示導是
諸菩薩皆於下方虛空中住彌勒等怪世尊成佛
未久云何於此少時大作佛事是事難信夫住於
下方空中自空言之孰爲上下孰爲四方孰爲四
維具足四行則受持讀誦廣說是經豈有古今豈
有老稚彌勒起疑以發語語尔

妙法蓮華經如來壽量品第十六

爾時佛告諸菩薩及一切大衆諸善男子汝等當信

解如來誠諦之語復告大衆汝等當信解如來誠諦之語又復告諸大衆汝等當信解如來誠諦之語是時菩薩大衆彌勒爲首合掌白佛言世尊惟願說之我等當信受佛語如是三白已復言惟願說之我等當信受佛語尔時世尊知諸菩薩三請不止而告之言汝等諦聽如來秘密神通之力一切世間天人及阿修羅皆謂今釋迦牟尼佛出釋氏宮去伽耶城不遠坐於道場得阿耨多羅三藐三菩提然善男子我實成佛已來無量無邊百千萬億那由他劫譬如五百千萬億那由他阿僧祇三千大千世界假使有人抹爲微塵過於東方五百千萬億那由他阿僧祇國

乃下一塵如是東行盡是微塵諸善男子於意云何是諸世界可得思惟校計知其數不彌勒菩薩等俱白佛言世尊是諸世界無量無邊非算數所知亦非心力所及一切聲聞辟支佛以無漏智不能思惟知其限數我等住阿惟越致地於是事中亦所不達世尊如是諸世界無量無邊尔時佛告大菩薩衆諸善男子今當分明宣語汝等是諸世界若著微塵及不著者盡以爲塵一塵一劫我成佛已來復過於此百萬億那由他阿僧祇劫自從是來我常在此娑婆世界說法教化亦於餘處百千萬億那由他阿僧祇國導利衆生

論曰昔所未說爲秘唯佛自證爲密離念了知爲神徹法明見爲通而謂之力者卽如來知見也以此知見觀其自住三摩地中前際不知其始後際不知其窮現在不知其邊智識所不能到思想所不能及故經言我實成佛已來無量無邊百千萬億那由他劫華嚴經曰佛子此菩薩摩訶薩住普賢行念念入百億不可說三昧然不見普賢菩薩三昧及佛境界莊嚴前際何以故知一切法究竟無盡故知一切佛刹無邊故知一切衆生界不思議故知前際無始故知未來無窮故知現在盡虛空遍法界無邊故知一切諸佛境界不可思議故

知一切菩薩行無數故知一切諸佛辯才所說境界不可說無邊故知一切幻心所緣法無量故圓覺經曰善男子覺成就故當知菩薩不與法縛不求法脫不厭生死不愛涅槃不敬持戒不憎毀禁不重久習不輕初學何以故一切覺故譬如眼光曉了前境其光圓滿得無憎愛何以故光體無二無憎愛故善男子此菩薩及末世衆生修習此心得成就者於此無修亦無成就圓覺普照寂滅無二於中百千萬億阿僧祇不可說恒河沙諸佛世界猶如空華亂起亂滅不卽不離無縛無脫始知衆生本來成佛生死涅槃猶如昨夢於普賢則名

行智成就於普眼則名覺智成就於此經則名如
來正智成就然行智之境一切心所緣法以幻譬
之覺智之境諸佛世界以空華譬之而如來正智
之境如經言今釋迦牟尼佛出釋氏宮去伽耶城
不遠坐於道場得阿耨多羅三藐三菩提者一切
世間天人及阿脩羅見幻事爲真實見空華有開
落者也

諸善男子於是中間我說然燈佛等又復言其入於
涅槃如是皆以方便分別諸善男子若有衆生來至
我所我以佛眼觀其信等諸根利鈍隨所應度處處
自說名字不同年紀大小亦復現言當入涅槃又以

種種方便說微妙法能令衆生發歡喜心諸善男子
如來見諸衆生樂於小法德薄垢重者爲是人說我
少出家得阿耨多羅三藐三菩提然我實成佛已來
久遠若斯但以方便教化衆生令入佛道作如是說
諸善男子如來所演經典皆爲度脫衆生或說已身
或說他身或示已身或示他身或示已事或示他事
諸所言說皆實不虛

論曰涅槃經曰譬如女人因嬰兒疾良醫授藥而
教之言若服藥已未可與乳須其藥消乃可乳之
女人卽以苦味自塗其乳兒觸苦味卽便棄去其
藥度消卽洗苦味呼兒與乳兒癡掉頭莫肯就飲

其母告曰我以毒塗須汝藥消藥今消已毒則洗去於是嬰兒則復飲乳經言我以佛眼觀其信等諸根利鈍隨所應度處處自說名字不同年紀大小亦復現言當入涅槃又以種種方便說微妙法者則苦塗水洗之譬也大莊嚴論曰譬如工畫師平起凹凸相如是虛分別於無見能所譬如善巧畫師能畫平壁起凹凸相實無高下而見有高下不真分別亦復如是於平等法界無二相處而常見有能所二相如經言如來所演經典皆爲度脫衆生或說已身或說他身或示已身或示他身或示已事或示他事諸所言說皆實不虛者則凹凸

高下之譬也苦塗水洗則母愛其子之至而見有高下非畫師之罪也

所以者何如來如實知見三界之相無有生死若退若出亦無在世及滅度者非實非虛非如非異不如三界見於三界如斯之事如來明見無有錯謬以諸衆生有種種性種種欲種種行種種憶想分別故欲令生諸善根以若干因緣譬喻言辭種種說法所作佛事未曾變廢

論曰陳那菩薩曰三界者唯以名言爲體由強分別非實有之法故不得真也將簡諸法自性令生不顛倒智經言無有生死者三界既是名言由妄

分別而有則生死寧是真實之物哉中觀論曰佛
所言說無不是實說生死無始何以故生死初後
不可得是故言無始汝謂若無初後應有中者是
亦不然何以故若無有始終中當云何有是故於
此中先後共亦無因中後故有初因初中故有後
若無初無後云何有中生死中無初中後是故說
先後共不可得何以故若使先有生後有老死者
不老死有生不生有老死若先有老死而後有生
者是則爲無因不生有老死如是觀時顛倒想滅
所謂若退而沒若出而離有在生死之世有入涅
槃之滅種種分別皆成戲論於是有涅槃之實有

生死之虛有理性之如有事相之異如來以如實
智而見三界如實之相無有分別故經言無有若
退若出亦無在世及滅度者過一切戲論也言不
如三界者猶言非實有三界見於三界而已問曰
不如三界則是正觀見於三界則是隨染其旨安
在曰以諸衆生有種種根性欲樂行業憶想分別
其病不同故雖無生死退出而說有生死退出亦
無在世滅度以若干因緣譬喻言辭種種法藥以
治之諸所施爲皆大慈悲之光所以淨佛國土成
就衆生之力者如此然於一切無有間斷故言未
曾斃廢

如是我成佛已來甚大久遠壽命無量阿僧祇劫常住不滅諸善男子我本行菩薩道所成壽命今猶未盡復倍上數然今非實滅度而便唱言當取滅度如來以是方便教化衆生所以者何若佛久住於世薄德之人不種善根貧窮下賤貪著五欲入於憶想妄見網中若見如來常在不滅便起憍恣而懷厭怠不能生難遭之想恭敬之心是故如來以方便說比丘當知諸佛出世難可值遇所以者何諸薄德人過無量百千萬億劫或有見佛或不見者以此事故我作是言諸比丘如來難可得見斯衆生等聞如是語必當生於難遭之想心懷戀慕渴仰於佛便種善根是

故如來雖不實滅而言滅度又善男子諸佛如來法皆如是爲度衆生皆實不虛譬如良醫智慧聰達明練方藥善治衆病其人多諸子息若二十乃至百數以有事緣遠至餘國諸子於後飲他毒藥藥發悶亂宛轉于地是時其父還來歸家諸子飲毒或失本心或不失者遙見其父皆大歡喜拜跪問訊善安隱歸我等愚癡誤服毒藥願見救療更賜壽命父見子等苦惱如是依諸經方求好藥草色香美味皆悉具足搆篩和合與子令服而作是言此大良藥色香美味皆悉具足汝等可服速除苦惱無復衆患其諸子中不失心者見此良藥色香俱好即便服之病盡除

愈餘失心者見其父來雖亦歡喜問訊求索治病然
與其藥而不肯服所以者何毒氣深入失本心故於
此好色香藥而謂不美父作是念此子可愍爲毒所
中心皆顛倒雖見我喜求索救療如是好藥而不肯
服我今當設方便令服此藥卽作是言汝等當知我
今衰老死時已至是好良藥今留在此汝可取服勿
憂不差作是教已復至他國遣使還告汝父已死是
時諸子聞父背喪心大憂惱而作是念若父在者慈
愍我等能見救護今者捨我遠喪他國自惟孤露無
復恃怙常懷悲感心遂醒悟乃知此藥色味香美卽
取服之毒病皆愈其父聞子悉已得差尋便來歸咸

使見之諸善男子於意云何頗有人能說此良醫虛
妄罪不不也世尊佛言我亦如是成佛已來無量無
邊百千萬億那由他阿僧祇劫爲衆生故以方便力
言當滅度亦無有能如法說我虛妄過者爾時世尊
欲重宣此義而說偈言

自我得佛來所經諸劫數無量百千萬億載阿僧祇
常說法教化無數億衆生今入於佛道爾來無量劫
爲度衆生故方便現涅槃而實不滅度常住此說法
我常住於此以諸神通力令顛倒衆生雖近而不見
衆見我滅度廣供養舍利咸皆懷戀慕而生渴仰心
衆生旣信伏質直意柔軟一心欲見佛不自惜身命

時我及衆僧俱出靈鷲山我時語衆生常在此不滅
以方便力故現有滅不滅餘國有衆生恭敬信學者
我復於彼中爲說無上法汝等不聞此但謂我滅度
我見諸衆生沒在於苦惱故不爲現身令其生渴仰
因其心戀慕乃出爲說法神通力如是於阿僧祇劫
常在靈鷲山及餘諸住處衆生見劫盡大火所燒時
我此土安隱天人常充滿園林諸堂閣種種寶莊嚴
寶樹多華果衆生所遊樂諸天擊天鼓常作衆伎樂
雨曼陀羅華散佛及大衆我淨土不毀而衆見燒盡
憂怖諸苦惱如是悉充滿是諸罪衆生以惡業因緣
過阿僧祇劫不聞三寶名諸有修功德柔和質直者

則皆見我身在此而說法或時爲此衆說佛壽無量
久乃見佛者爲說佛難值我智力如是慧光照無量
壽命無數劫久修業所得汝等有智者勿於此生疑
當斷令未盡佛語實不虛如醫善方便爲治狂子故
實在而言死無能說虛妄我亦爲世父救諸苦患者
爲凡夫顛倒實在而言滅以常見我故而生憍恣心
放逸著五欲墮於惡道中我常知衆生行道不行道
隨所應可度爲說種種法每自作是意以何令衆生
得入無上慧速成就佛身

論曰常住不滅唱言取滅二種相違何也曰涅槃
經曰甘露之性令人不死若合異物亦能不死故

知寂滅而甘露者不死之滅不死之滅則常住不
滅之謂也修多羅亦曰甘露滅亦曰甘露寂滅則
與唱言當取滅者不侔因其所也問曰佛自喻良
醫何也曰以其能療衆生生死之病而證不死之
滅故涅槃經又曰大慈愍衆生故令我歸依善後
衆毒箭故稱大醫王也世醫所療治雖瘥還復生
如來所治者畢竟不復發世尊甘露藥以施諸衆
生衆生既服已不死亦不生然醫之所治有種種
有治病而病增者空見外道是也肆情行惡而教
令一切人起邪見斷善根故有治病而病無增損
者苦行外道是也以投爇赴火爲行旣不得禪定

又不能斷愛結故有治病而病損然不能禁其損
已復生則修定斷結外道是也有治病而病已損
更不復生但其所治不徧則二乘是也但治其有
緣者不能徧一切故有能徧治諸病然無巧妙之
工以止痛惱釋論以拙度名之則六度菩薩是也
有治病而其術神驗雖能止痛惱而未能起死則
地前菩薩是也但治凡夫以其有反復心不治二
乘以其種已焦壞故有能治難瘡之病而能起死
則地上菩薩是也而佛則知醫之邪正斥邪取正
隨病而授藥故稱大醫王故佛自喻良醫也
無盡居士論曰彌勒旣聞地涌菩薩因緣與大衆

懷疑請問佛三告之曰汝當信解如來誠諦之語
彌勒等三請不止佛始告之我實成佛已來甚大
久遠壽命無量但以方便教化衆生令入佛道實
無生死若退若出亦無在世及滅度者夫三界唯
心萬法唯識真識靈明而常寂真心虛寂而常周
了知下界之虛空何用他方之往反大慈大悲以
度五濁之苦則三十所以成道難值難遭以起衆
生之想則雙林所以入滅默而喻之則方便皆誠
諦之語執而索之則如如成幻戲之論李長者謂
法華經引權就實予竊以爲不然何以故過去之
日月燈明無量之大通智勝十方之分身諸佛十

方之河沙菩薩住世四十九年而法會移頃乃坐
五十小劫耆闍崛山不遠王城而三千大千世界
山川震裂佛所言說誠實不虛譬如良醫示死本
無虛妄之咎狂子飲藥遂愈失心之疾以此而思
教意則引權就實豈一音誠諦之語哉

妙法蓮華經分別功德品第十七

爾時大會聞佛說壽命劫數長遠如是無量無邊阿
僧祇衆生得大饒益於時世尊告彌勒菩薩摩訶薩
阿逸多我說是如來壽命長遠時六百八十萬億那
由他恒河沙衆生得無生法忍復有千倍菩薩摩訶
薩得聞持陁羅尼門復有一世界微塵數菩薩摩訶

薩得樂說無礙辯才復有一世界微塵數菩薩摩訶
薩得百千萬億無量旋陀羅尼復有三千大千世界
微塵數菩薩摩訶薩能轉不退法輪復有二千中國
土微塵數菩薩摩訶薩能轉清淨法輪復有小千國
土微塵數菩薩摩訶薩八生當得阿耨多羅三藐三
菩提復有四四天下微塵數菩薩摩訶薩四生當得
阿耨多羅三藐三菩提復有三四天下微塵數菩薩
摩訶薩三生當得阿耨多羅三藐三菩提復有二四
天下微塵數菩薩摩訶薩二生當得阿耨多羅三藐
三菩提復有一四天下微塵數菩薩摩訶薩一生當
得阿耨多羅三藐三菩提復有八世界微塵衆生皆

發阿耨多羅三藐三菩提心

論曰三世如來付授一切菩薩修行法式詮量淺
深力用分別地位等差始自十信然以爲信者尚
屬生滅故當住心乃成十住又以爲住者缺資發
方便之用故有行心乃成十行又以爲行者止以
自利未有以及衆生故施回向心乃成十回向自
十信至十住自十住至十行自十行至十回向名
三賢位又自三賢登初地以大慈大悲發生資養
茂盛成熟之故名十地而初地方曰證無生忍乃
至十地之終鍊磨淘汰之功盡矣則方舉本覺真
如等故名等覺經言六百萬億那由他恆河沙衆

生得無生法忍者自凡夫身以聞經之力越登初
地故又言復有千倍菩薩摩訶薩得聞持陀羅尼
門者以聞經之力倍進第二地故又言復有一世
界微塵數菩薩摩訶薩得樂說無礙辯才者以聞
經之力漸進第三地故又言復有一世界微塵數
菩薩摩訶薩得百千萬億無量旋陀羅尼者以聞
經之力復進第四地故又言復有三千大千世界
微塵數菩薩摩訶薩得轉不退法輪者以聞經之
力增進第五地故又言復有二千中國土微塵數
菩薩摩訶薩能轉清淨法輪者以聞經之力升進
第六地故又言復有小千國土微塵數菩薩摩訶

薩八生當得阿耨多羅三藐三菩提者超進第七
地而必曰八生當得阿耨多羅三藐三菩提者八
地以七地修進之功已極無明之惑斷盡任運而
登覺道故也譬如夢欲渡河者銳其功力忽然夢
覺功力俱失華嚴論曰初地中緣一切佛法願求
滿故第二地離心垢故第三地願轉增長得法光
明故第四地入道故第五地順世所作故第六地
入甚深法門故第七地超一切佛法故皆已滿足
菩提分法故又明初地乃至七地成就智功用故
八地乃至十地成就無功用行故以第七地已前
皆有功用第八地已去得無功用故經自八地已

去皆無功用之旨也而言復有四四天下乃至三
四天下乃至二四天下乃至一四天下微塵數菩
薩摩訶薩以四生以三生以二生以一生而皆得
阿耨多羅三藐三菩提者無功用旨之證也又言
復有八世界微塵數衆生皆發阿耨多羅三藐三
菩提心者以前文自凡夫身已至等覺而特言衆
生發心則示此經必欲令凡實證也修多羅中第
八地作月喻曰月自生魄以至十五夕圓則光漸
增者此地地增進之功也而自十六日以至晦則
光漸減者以絕增進之功也以是觀其辭叙七番
之功德漸盛乃於第八截然而止但曰菩提菩提

豈有功用可以加之耶

佛說是諸菩薩摩訶薩得大法利時於虛空中雨曼
陀羅華摩訶曼陀羅華以散無量百千萬億寶樹下
師子座上諸佛并散七寶塔中師子座上釋迦牟尼
佛及久滅度多寶如來亦散一切諸大菩薩及四部
衆又雨細末栴檀沉水香等於虛空中天鼓自鳴妙
聲深遠又雨千種天衣垂諸瓔珞真珠瓔珞摩尼珠
瓔珞如意珠瓔珞徧於九方衆寶香爐燒無價香自
然周至供養大會一一佛上有諸菩薩執持幡蓋次
第而上至于梵天是諸菩薩以妙音聲歌無量頌讚
歎諸佛亦時彌勒菩薩從座而起徧袒右肩合掌向

佛而說偈言

佛說希有法昔所未曾聞世尊有大力壽命不可量
無數諸佛子聞世尊分別說得法利者歡喜充徧身
或住不退地或得陀羅尼或無礙樂說萬億旋總持
或有大千界微塵數菩薩各各皆能轉不退之法輪
或有中千界微塵數菩薩各各皆能轉清淨之法輪
復有小千界微塵數菩薩餘各八生在當得成佛道
復有四三二如此四天下微塵諸菩薩隨數生成佛
或一四天下微塵數菩薩餘有一生在當成一切智
如是等衆生聞佛壽長遠得無量無漏清淨之果報
復有八世界微塵數衆生聞佛說壽命皆發無上心

世尊說無量不可思議法多有所饒益如虛空無

雨天曷陀羅摩訶曷陀羅釋梵如恒沙無數佛土來
雨栴檀沉水續紛而亂墜如鳥飛空下供散於諸佛
天鼓虛空中自然出妙聲天衣千萬種旋轉而來下
衆寶妙香爐燒無價之香自然悉周徧供養諸世尊
其大菩薩衆執七寶旛蓋高妙萬億種次第至梵天
一一諸佛前寶幢懸勝旛亦以千萬偈歌詠諸如來
如是種種事昔所未曾有聞佛壽無量一切皆歡喜
佛名聞十方廣饒益衆生一切具善根以助無上心
論曰經言佛說是菩薩摩訶薩得大法利者以分
三種力故一者如來功德之力二者信解之力三

者慈善根力何名如來功德之力曰以深厚心好
樂供養諸佛禮拜一切塔廟諸妙因集諸善法故
言於虛空中雨曼陀羅華乃至大會一一佛上以
明不忘法道之恩而離生死之畏故維摩詰曰當依
菩薩於生死中有畏當依何法而維摩詰曰當依
如來功德之力也宋僧曇諦吳興康氏子也初母
夢僧以塵尾鐵縷書鎮寄之既覺而二物在前已
而生諦諦五歲母以二物示之笑曰秦主餉我者
耳十歲隨其父彤過關中見僧呼僧誓碧願見童
子曰汝乃敢名宿士耶諦曰省擷蔬野猪傷我足童子
乎誓大驚曰宏覺嘗遣我擷蔬野猪傷我足童子

何從知之彤以塵尾鐵縷書鎮示之碧泣曰先師
爲媿萇講法華經二物萇所供者也夫出生入死
奇驗如此是謂如來功德之力也

爾時佛告彌勒菩薩摩訶薩阿逸多其有衆生聞佛
壽命長遠如是乃至能生一念信解所得功德無有
限量若有善男子善女人爲阿耨多羅三藐三菩提
故於八十萬億那由他劫行五波羅蜜檀波羅蜜尸
羅波羅蜜羸提波羅蜜毗梨耶波羅蜜禪波羅蜜除
般若波羅蜜以是功德比前功德百分千分百千萬
億分不及其一乃至算數譬喻所不能知若善男子
善女人有如是功德於阿耨多羅三藐三菩提退者

無有是處爾時世尊欲重宣此義而說偈言
若人求佛慧於八十萬億那由他劫數行五波羅蜜
於是諸劫中布施供養佛及緣覺弟子并諸菩薩衆
珍異之飲食上服與卧具栴檀立精舍以園林莊嚴
如是等布施種種皆微妙盡此諸劫數以回向佛道
若復持禁戒清淨無缺漏求於無上道諸佛之所歎
若復行忍辱住於調柔地設衆惡來加其心不傾動
諸有得法者懷於增上慢爲此所輕惱如是亦能忍
若復勤精進志念常堅固於無量億劫一心不懈息
又於無數劫住於空閑處若坐若經行除睡常攝心
以是因緣故能生諸禪定八十億萬劫安住心不亂

持此一心福願求無上道我得一切智盡諸禪定際
是人於百千萬億劫數中行此諸功德如上的所說
有善男女等聞我說壽命乃至一念信其福過於彼
若人悉無有一切諸疑悔深心須臾信其福爲如此
其有諸菩薩無量劫行道聞我說壽命是則能信受
如是諸人等頂受此經典願我於未來長壽度衆生
如今日世尊諸釋中之王道場師子吼說法無所畏
我等未來世一切所尊敬坐於道場時說壽亦如是
若有深心者清淨而質直多聞能總持隨義解佛語
如是之人等於此無有疑

論曰何名信解之力曰以得自心如實受用故經

言其有衆生聞佛壽命長遠如是乃至能生一念
信解所得功德無有限量者以得自心如實受用
也夫自心如實受用則是無功之功無功之功卽
智慧智慧者般若也般若非可解非不可解何以
故以離一切法相故金剛般若經曰須菩提發阿
耨多羅三藐三菩提心者於一切法應如是知如
是見如是信解不生法相所謂不生法相與所得
功德無有限量其旨同也故言於八十萬億那由
他劫行五波羅蜜而除般若波羅蜜者以五波羅
蜜之功德皆有限量所以比類之曰百分千分百
千萬億分不及其一乃至算數譬喻所不能及也

晉建興二年長沙縣西有千葉青蓮華兩本生於
陸地官吏掘之丈許根莖出於瓦棺發棺有白骨
一聚而蓮之根蒂出鬪髀齒骨間有銘記棺上曰
有僧不知姓氏誦法華經至千萬部將化遺言令
以紙爲衣以瓦爲棺塋于此事聞朝廷有詔建寺
其處號曰蓮華今驛亭其故基基近譙門因號蓮
華門門臨湘江洄瀆處又號蓮華潭其於生死之
間殊勝竒瑞如此是謂信解之力也

又阿逸多若有聞佛壽命長遠解其言趣是人所得
功德無有限量能起如來無上之慧何況廣聞是經
若教人聞若自持若教人持若自書若教人書若以

華香瓔珞幢幡繒蓋香油蘇燈供養經卷是人功德
無量無邊能生一切種智阿逸多若善男子善女人
聞我說壽命長遠深心信解則爲見佛常在耆闍崛
山共大菩薩諸聲聞衆圍繞說法又見此娑婆世界
其地瑠璃坦然平正闍浮檀金以界八道寶樹行列
諸臺樓觀皆悉寶成其菩薩衆咸處其中若有能如
是觀者當知是爲深信解相又復如來滅後若聞是
經而不毀訾起隨喜心當知已爲深信解相何況讀
誦受持之者斯人則爲頂戴如來阿逸多是善男子
善女人不須爲我復起塔寺及作僧坊以四事供養
衆僧所以者何是善男子善女人受持讀誦是經

者爲已起塔造立僧坊供養衆僧則爲以佛舍利起
七寶塔高廣漸小至于梵天懸諸幡蓋及衆寶鈴華
香瓔珞末香塗香燒香衆鼓伎樂簫笛篳篥種種舞
戲以妙音聲歌唄讚頌則爲於無量千萬億劫作是
供養已阿逸多若我滅後聞是經典有能受持若自
書若教人書則爲起立僧坊以赤栴檀作諸殿堂三
木有二高八多羅樹高廣嚴好百千比丘於其中止
園林浴池經行禪窟衣服飲食牀褥湯藥一切樂具
充滿其中如是僧坊堂閣若千百千萬億其數無量
以此現前供養於我及比丘僧是故我說如來滅後
若有受持讀誦爲他人說若自書若教人書供養經

卷不須復起塔寺及造僧坊供養衆僧况復有人能持是經兼行布施持戒忍辱精進一心智慧其德最勝無量無邊譬如虛空東西南北四維上下無量無邊是人功德亦復如是無量無邊疾至一切種智若人讀誦受持是經爲他人說若自書若教人書復能起塔及造僧坊供養讚歎聲聞衆僧亦以百千萬億讚歎之法讚歎菩薩功德又爲他人種種因緣隨義解說此法華經復能清淨持戒與柔和者而共同止忍辱無瞋志念堅固常貴坐禪得諸深定精進勇猛攝諸善法利根智慧善答問難阿逸多若我滅後諸善男子善女人受持讀誦是經典者復有如是諸善

功德當知是人已趣道場近阿耨多羅三藐三菩提生道樹下阿逸多是善男子善女人若坐若立若行處此中便應起塔一切天人皆應供養如佛之塔尔時世尊欲重宣此義而說偈言

若我滅度後能奉持此經斯人福無量如上之所說是則爲具足一切諸供養以舍利起塔七寶而莊嚴表刹甚高廣漸小至梵天寶鈴千萬億風動出妙音又於無量劫而供養此塔華香諸瓔珞天衣衆技樂然香油蘇燈周而常照明惡世法末時能持是經者則爲已如上具足諸供養若能持此經則如佛現在以牛頭栴檀起僧坊供養堂有三十二高八多羅樹

上饒妙衣服牀卧皆具足百千衆住處園林諸浴池
經行及禪窟種種皆嚴好若有信解心受持讀誦書
若復教人書及供養經卷散華香末香以須臾蔭蔭
阿提目多伽熏油常然之如是供養者得無量功德
如虛空無邊其福亦如是况復持此經薰布施持戒
忍辱樂禪定不瞋不惡口恭敬於塔廟謙下諸比丘
遠離自高心常思惟智慧有問難不瞋隨順爲解說
若能行是行功德不可量若見此法師成就如是德
應以天華散天衣覆其身頭面接足禮生心如佛想
又應作是念不久詣道樹得無漏無爲廣刊諸人天
止所住止處經行若坐卧乃至說一偈是中應起塔

莊嚴令妙好種種以供養佛子住此地則是佛受用
常在於其中經行及坐卧

論曰何名慈善根力曰以成熟心不動本際徧應
十方一切衆生之前對現色身三昧故經言深心
信解則爲見佛常在耆闍崛山共大菩薩諸聲聞
衆圍繞說法又見此娑婆世界其地瑠璃坦然平
正閻浮檀金以界八道乃至是名深信解相以明
慈善根力令衆生自然見如是事涅槃經曰調達
教阿闍世王放五百護財醉象奔衝世尊來衆爾
時佛垂十指醉象見佛十指間皆有師子驚怖伏
地遺糞而去佛言善男子我時指中實無師子豈

我慈善根力令諸醉象見有師子陳僧慧思坐夏
衡岳夏休自念此夏空過又無所證放身倚壁未
至之間豁然大悟曰是真精進是名真法供養如
來於是諦見靈山一會儼然如昨於自悟親證之
際靈妙發現如此是謂慈善根力也舊疏曰加修
觀行入禪用慧想成相起能見有餘實報兩土想
懇見佛共比丘僧常在耆闍崛山者方便有餘土
相也此殆夢中之語也其可憑哉相好
無盡居士論曰會中間佛壽命長遠若菩薩若衆
生或一念信解或解其言趣若自持或自書若教
人持教人書是人所得功德無有限量自一四天

下菩薩至于小千世界菩薩至于中千大千微塵
數菩薩得聞陀羅尼以至于得阿耨多羅三藐三
菩提自六百萬億那由他恒河沙衆生至于八世
界微塵數衆生得無生法忍以至于發阿耨多羅
三藐三菩提心其法利饒益廣大無邊如此而佛
言曰聞我說壽命長遠深心信解則爲見佛常在
耆闍崛山又曰若能受持讀誦是經則爲以佛舍
利起七寶塔高廣漸至梵天懸諸幡蓋及衆寶鈴
華香瓔珞鼓樂妙聲以作供養古德曰凡觀經教
皆須宛轉歸就自心此分別功德之旨也

妙法蓮華經合論卷第五

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

音釋

糶忍九瀑音暴間斷上去差楚懈幸差下楚施上去

分上去法上去塵音生餉或亮彤以中碧音累碧音辯

擷胡結長徐良觀行並去

善圍山又曰故地交林黃鶴長懸眼為以對合

言曰開非爾善命我我聚少許難快為良常非

三幾三善其必其太保計益爾大無數吹九而

界端聖境界土特於土去恩以至於資四林多

善其自六百萬就派由此四四少泉土

燒音對音開湖羅又以至干於河林多

不善對至干小干也界善對至干中干



廿

廿四